

四庫全書

經部

欽定四庫全書

經部

五禮通考卷一百七十八

詳校官太常寺少卿<sub>臣</sub>陳桂森

給事中<sub>臣</sub>溫常綬覆勘

總校官進士<sub>臣</sub>繆琪

校對官中書<sub>臣</sub>王鍾泰

謄錄監生<sub>臣</sub>張士琛

欽定四庫全書

五禮通考卷一百七十八

刑部尚書秦蕙田撰

嘉禮五十一

巡狩

蕙田案巡狩之制見于經者多矣參以史記五  
帝本紀及竹書紀年皇甫謐帝王世紀羅泌路  
史金履祥通鑑前編諸書則自黃帝顓頊已有

巡方之典不始于唐虞也蓋先王以此察諸侯之政治聯遠方之聲教諮兆民之疾苦乃維持天下之大權其意深遠矣秦漢以下封建變為郡縣形勢雖異於古然時邁所及察吏治觀民風考其用意與唐虞三代若合符節焉唐開元禮及杜佑通典以巡狩屬吉禮宋史改屬嘉禮今從宋史先之以經訓而後世之史事附焉

易觀卦象曰風行地上觀先王以省方觀民設教



程子曰風行地上周及庶物為游歷周覽之象故先  
王體之為省方之禮以觀民俗而設政教也天子巡  
省四方觀視民俗設為政教如奢則約之以儉儉則  
示之以禮是也

朱子曰省方以觀民設教以為觀

春秋莊公二十三年左氏傳諸侯有王

注從王  
事

王有巡狩

注省  
四方

孟子齊景公問于晏子曰吾欲觀于轉附朝儻導海而

南放于琅邪吾何修而可以比于先王觀也晏子對曰

天子適諸侯曰巡狩巡狩者巡所守也無非事者春省

耕而補不足秋省斂而助不給夏諺曰吾王不遊吾何

以休吾王不豫吾何以助一遊一豫為諸侯度

注言天子出必

因王事有所補助于民無非事而空行者春省耕補耒  
耜之不足秋省斂助其力不給也晏子又道夏禹之世  
民之諺語王者巡狩觀民其行從容若遊若豫豫亦遊  
也遊亦豫也春秋傳曰魯季氏有嘉樹晉韓宣子豫焉  
吾王不遊吾何以得見勞苦蒙休息也吾王不豫吾何  
以得見賑贍助不足也王者一遊一豫行恩布德應法  
而出可以為諸  
侯之法度也

今也不然師行而糧食饑者弗食勞者

弗息眊眊胥讒民乃作慝方命虐民飲食若流流連荒  
亡為諸侯憂從流下而忘反謂之流從流上而忘反謂  
之連從獸無厭謂之荒樂酒無厭謂之亡

注眊眊側目  
相視更相讒

惡先王無流連之樂荒亡之行惟君所行也

注言聖人  
之行無此

者四

天子適諸侯曰巡狩春省耕而補不足秋省斂而助不  
給入其疆土地辟田野治養老尊賢俊傑在位則有慶  
慶以地入其疆土地荒蕪遺老失賢陪克在位則有讓

注虞賞也養老尊賢能者在位賞之以地益其地也梧克不良之人在位則責讓之

白虎通德論王者必制巡狩之禮何尊天重民也所以至四嶽者何盛德之山四方之中能興雲致雨也以夏之中月同律度得其中也

風俗通義巡者循也狩者牧也道德太平王者為天循行以牧人也恐遠近不同化幽隱有不得所者故自躬親行之

孔氏穎達曰所以為此巡守之禮者以諸侯為天子

守土專制一國告從令行而王者垂帷端拱深居高  
視一日二日庶事萬幾耳目不達于遠方神明不照  
于幽僻或將強以陵弱恃衆以侵寡擁遏上命寃不  
上聞而使遠道細民受枉聖世聖王知其如是故制  
為此禮時自巡之

呂氏祖謙曰巡守之禮此乃維持治具提攝人心聖  
人運天下妙處蓋人心久必易散政事久必有闕一  
次巡守一次提攝此新新不已之意

朱子曰或問建牧立伯小大相維自可以垂拱無為  
矣何故復有巡守之舉豈牧伯不足任耶或云因以  
祭天且朝諸侯又云君民一體不可邈然不相接故  
必躬親巡撫然後上下情通而教化洽矣此先王之  
誠心二說孰是曰建牧立監與巡守之義並行不悖  
祭天朝諸侯巡撫之意皆在其中矣先王之政體用  
兼舉本末備具非若後世儒者一偏之說有體而無  
用得本而遺末也巡守亦非舜創立此制蓋亦循襲

將來黃帝紀亦云披山通道未嘗寧居

右巡狩名義

書舜典五載一巡狩羣后四朝

注各會朝于方岳之下凡四處故曰四朝堯舜

同道舜攝則然堯又可知疏每五歲一巡守其巡守之年諸侯羣后四方各朝天子于方岳之下凡四處別一朝故云四朝肆覲東后是為一朝四岳禮同四朝見矣

朱子曰五載之內天子巡守者一諸侯來朝者四蓋巡守之明年則東方諸侯來朝于天子之國又明年則南方諸侯來朝又明年則西方諸侯來朝又明年

則北方諸侯來朝又明年則天子復巡守

蕙田案四朝有三說謂四面各朝于方岳之下者孔安國馬融王肅孔穎達也謂四季朝京師者鄭康成也謂五載內諸侯來朝者四皆分方而至者朱子蔡仲默也當以朱蔡之說為正說見賓禮

禮記王制天子五年一巡守

注天子以海內為家時一巡省之五年者虞夏之制

也周則十二歲一巡守

疏鄭志唐虞五載一巡守夏殷六年一巡守此云虞夏之制以夏與虞同與鄭志乖



者以羣后四朝文在堯典堯典是  
虞夏之書故連言夏其實虞也

方氏慤曰五為天地相合之數君臣  
之際有天地之義故取數以五為節

白虎通德論所以五歲巡狩何五歲再閏天道大備  
王者恩亦當竟也不及五載為太煩也過五年為太  
疎也王者因天之道時有所生歲有所成三歲一閏  
天道小備五歲再閏天道大備故五歲一巡狩春秋  
穀梁傳曰古之君子以時視民之勤此之謂也

蕙田案以上巡狩五年之期

周禮秋官大行人十有二歲王巡守殷國

注王巡守諸侯會者各以

其時之方書曰遂觀東后是也其殷國則四方四時分來如平時疏云殷國四方四時分來如平時者謂分四方各逐春夏秋冬如平時若六服盡來即與平時別也

李氏曰周以木德王歲星是木王之星十二歲一周天故巡守取歲星一周天道大備之數也

鄭氏鍔曰至十二歲王乃巡其所守變禮易樂者可以知其畔革制度者可以知其逆或討或流于是行焉若或有故而不巡守則合天下諸侯皆來朝王于京師考其制度焉是謂殷國殷者衆也言命衆國而皆至也

楊氏曰虞舜之世其事簡其人寡其于巡守也兵衛少征求輕故行之五歲不為數成周之世其事繁其

人衆其于巡守也兵衛多征求重故行之十二歲不為疎

王氏安石曰王巡狩則諸侯各朝于方岳王不巡守則會諸侯而殷見或巡守或殷國其出而省焉一也呂氏祖謙曰巡守之禮唐虞五載一巡守周却十二年何故蓋周時文治漸成禮文漸備所以十二年方舉巡守之事此是成王知時變識會通處

蕙田案巡守與殷國乃兩事非一事蓋十二年一巡守者其常也或十二年之期已周而天子有事不能巡守則行殷國之禮此其變也鄭註甚明王氏李氏乃云殷衆也謂當方

諸侯則以巡守殷國為一事矣案此經上文於春朝秋覲夏宗冬遇之下明云時會以發四方之禁殷同以施天下之政鄭註云時會即時見也無常期諸侯有不順服者王將有征討之事則既朝王命為壇於國外合諸侯而發禁命事焉殷同即殷見也王十二歲一巡守若不巡守則殷同殷同者六服盡朝既朝王亦命為壇於國外合諸侯而命其政殷

同四方四時分來歲終則徧矣然則殷者諸  
侯朝王之一法因王不巡守而行之故並繫  
于十有二歲之下鄭註云如平時而賈疏復  
申之云若六服盡來即與平時別者六服盡  
來不分四時此時會也雖不按服數而東春  
南夏西秋北冬四方分來此殷同也時會乃  
因王有征伐故行之則非常之事故六服盡  
來殷同特以代巡守故不必一時皆集義各

有當耳王荊公說最確當從之

書周官六年五服一朝又六年王乃時巡考制度于四

岳諸侯各朝于方岳大明黜陟

注五服侯甸男采衛六年一朝會京師周制十

二年一巡守春東夏南秋西冬北故曰時巡考正制度禮法于四岳之下如虞帝巡守然四方諸侯各朝于方

岳之下大明考績黜陟之法疏此篇說六年五服一朝周禮無此法也周禮大行人侯歲一見貢祀物甸二

歲一見貢嬪物男三歲一見貢器物采四歲一見貢服物衛五歲一見貢材物要六歲一見貢貨物先儒云見

謂來朝也必如所言則周之諸侯各以服數來朝無六年一朝之事昭十三年左傳叔向云明王之制使諸侯

歲聘以志業間朝以講禮再朝而會以示威再會而盟以顯昭明自古以來未之或失也說者以為三年一朝

六年一會十二年而盟計彼六年一會與此六年五服一朝事相當也再會而盟與此十二年王乃時巡亦相當也叔向盛陳此法以懼齊人若周無此禮齊人當以辭拒之何所畏乎且云自古以來未之或失則當時猶尚行之明周有此法禮文不具耳大行人所云見者皆言貢物或可因貢而見何必見者皆是君自朝乎遣使貢物亦應可矣大宗伯云時見曰會殷見曰同時見殷見不云年限時見曰會何必不是再朝而會乎殷見曰同何必不是再會而盟乎周公制禮若無此法豈成王謬言叔向妄說也

朱氏升曰案此篇與今周禮不同此言六年五服一朝而周禮六服諸侯有一歲一見者二歲一見者三歲一見者與此不合要之周禮首末未備周公未成之書也

蕙田案尚書六年一朝周禮以服數來朝二

者不同孔疏謂成周時自有二法元儒朱升作旁訓復據書以疑周禮竊恐未然蓋叔向所言本無年數其年數皆係解左傳者臆度之詞孔氏據以當六年之說未可信也至大行人所云見者與十二年一巡守之文緊緊承接明係朝之正禮今欲伸尚書而強指為因貢而見之變禮太宗伯所云會同即大行人之所謂時會殷同明係在朝宗覲遇之外



今欲牽合尚書而遂指為朝之常法此皆偏曲之見也蘇子瞻云一朝畢朝也朝以遠近為疏數六年而遍五服畢朝也此說最為明了蓋尚書周禮本無二法先儒不得其說強生分別皆非也詳見賓禮

又案以上十二年巡狩之期

辨鄭氏夏殷六年一巡狩

孔穎達禮記正義案鄭志孫皓問鄭答云唐虞之時五載一巡守夏殷之時天子蓋六年一巡守六年者

取半一歲  
之律呂也

蕙田案唐虞巡守之期見於尚書周巡守之  
期見於周禮夏殷之制不見於經其云六年  
者康成臆度之言耳孔氏又從而為之說以  
為取律呂之半則更無據

觀承案康成夏殷六年巡狩之說未可謂無  
据也唐虞五載一巡狩固是五年周禮又六  
年王乃時巡固是十二年然先曰六年五服

一朝明是六年之中五服已徧朝此年原是  
六年巡狩之常期但係夏殷之禮周時已不  
能行故特空此一年而後曰又六年王乃時  
巡是前六年雖居其期而不行直至又六年  
而乃行耳此猶唐虞建官惟百夏商官倍則  
二百故夏殷六年一巡狩周禮倍之則又六  
年也蓋唐虞分方朝覲羣后四朝須四年而  
徧故第五年乃時巡夏殷既分五服咸建五

長須五年而徧故第六年而後時巡此細玩  
經文而可得者鄭說不為無据也然如孔氏  
謂取律呂之半則不免附會耳

易復卦象曰雷在地中復先王以至日閉關商旅不行  
后不省方

胡氏曰舜以十一月朔巡狩而此言后不省方  
則知巡狩者是月也不省方者是月之至日也

書舜典歲二月東巡守至于岱宗五月南巡守至于南  
岳八月西巡守至于西岳十有一月朔巡守至于北岳

歸格于藝祖

注諸侯為天子守土故稱守巡行之岱宗泰山為四岳所宗南岳衡山自東岳南巡

五月至西岳華山北岳恒山巡守四岳然後歸告至文祖之廟藝文也言祖則考著疏爾雅泰山為東岳此

巡守至于岱岱與泰山有二名也風俗通云泰山之尊者岱始也宗長也萬物之始陰陽交代故為五岳之

長釋山云河南華河東岱河北恒江南衡又云泰山為東岳華山為西岳霍山為南岳恒山為北岳岱與泰山為

與霍皆一山有二名也張揖云天柱謂之霍山漢書地理志云天柱在廬江蕩縣則霍山在江北而與江南衡

為一者郭璞云霍山在廬江蕩縣漢武帝以衡山遼曠故移其神于此今其彼土俗人皆呼之為南岳南岳本

自以兩山為名非從近來也而學者多以霍山不得為南岳又云漢武帝來始乃名之即如此言謂武帝在爾

雅前乎斯不然矣是解衡霍二名之由也四巡之後乃云歸格則是一出而周四岳故知自東岳而即南行以

五月至也王者順天道以行人事故四時之月各當其時之中故以仲月至其岳鄭玄以為每岳禮畢而歸仲月乃復更去若如鄭言當于東巡之下即言歸格後以如初包之何當北巡之後始言歸乎且若來而復去計程不得周遍此事必不然也

禮記王制歲二月東巡守至于岱宗五月南巡守至于南嶽八月西巡守至于西嶽十有一月北巡守至于北

嶽歸格于祖禰

注岱宗東嶽假至也仲月者以律歷當得其中也二月八

疏巡守皆以夏

月又晝夜分五月十一月者陰陽終故用四仲也孔注尚書自東嶽南巡五月至則是從東嶽而去鄭注云每歸格于祖言每歸似嶽別一歸若嶽別一歸而更去便是路遠無由可至

辨崔氏一年巡一嶽

崔氏靈恩曰唐虞五載巡狩一岳二十年方遍四岳周則四十八年矣若一出四岳皆遍且闕四時祭享唐虞衡山為南岳周氏霍山為南岳其祭吉行五十里若以二月到東岳五月到南岳八月到西岳十一月到北岳路程遼遠固必不及此知每至一岳即歸義為長

杜氏佑曰梁崔靈恩三禮義宗云唐虞五載巡狩一岳二十年方遍四岳周則四十八年矣案尚書周官篇云六年五服一朝又六年王乃時巡考制度諸侯各朝於方岳大明黜陟又案堯舜簡儉嘗稱菲茨土

階巡狩四方羽儀導從必少一年四岳五載復往宗廟享祭暨委有司展義省方觀風察俗之大政如或二十年方遍及於民物不亦乖疎詳周官本文與孔氏註解既改制十有二載比唐虞已甚遐闊如四十八年乃遍豈非益為曠邈乎且周雖尚文天子諸侯降殺以兩穆王巡歷天下萬姓不甚勞苦始皇遊幸四方屬車八十一乘二漢以降至于有隋或東封告成或觀省風俗百辟悉至羣司畢從不下十餘萬人



何止千乘萬騎所以曠代多闕斯禮崔生謂堯舜及周帝王行幸車徒禮數與秦漢以後無異斯不達古今豐約之別復不詳周官之文輒肆臆度之說耳

呂氏祖謙曰舜典王制明言二月東巡五月南巡八月西巡十一月北巡而崔靈恩乃以為一年巡一嶽虞五載則二十年而遍周十二載則四十八年而遍不知何據

馬氏端臨曰案舜典王制明言二月東巡五月南巡

八月西巡十一月北巡而崔靈恩乃以為一年巡一岳何所據耶古帝王之巡狩所以省方觀民初非游適然舜之時五載僅能一行至周成王則又不能如舜至於十二年乃一行之又必止以四岳為底止之地蓋雖一本於憂民之心而尚恐有煩民之事故出必有期而行必有方如此

聞見後錄舜一歲而巡四岳南方多暑以五月之暑而南至衡山北方多寒以十一月之寒而至常山世之頗疑

蕙田案舜典歸格藝祖王制歸假祖禘其文  
皆承四巡之後本無可疑鄭康成創為每巡  
一岳歸而復往之說崔靈恩知其說之不可  
通而強欲回護遂謂五載一巡止至一岳若  
遍周四岳須二十年謬矣諸儒駁之甚當

又案每巡皆用夏時中月易稱至日不省方  
非謂十一月不省方原並行不悖若邵氏之  
聞見後錄乃因仲夏盛暑不宜至衡山炎熱

之地仲冬苦寒不當至恒山冰雪之區是以  
常情之偷惰窺測聖人矣

又案南岳衡山本無可疑惟因爾雅釋山乃  
有二條前云衡山後云霍山遂滋後儒之疑  
郭璞回護爾雅乃云一山二名不知爾雅為  
後儒所亂移衡山于霍山漢武帝事後一條  
明屬漢儒附益其文耳本朝宿松朱書字綠  
作南岳辨一卷謂衡山僻遠斷無時巡之理

因謂經文衡山即霍山也不知古聖人法天  
行健不敢自暇自逸舜至九疑禹臨會稽何  
嘗以其僻遠而畏遠行耶

右巡狩之期

書舜典歲二月東巡守至于岱宗柴望秩于山川肆觀  
東后協時月正日同律度量衡修五禮五玉三帛二生  
一死贄如五器卒乃復五月南巡守至于南岳如岱禮  
八月西巡守至于西岳如初十有一月朔巡守至于北

岳如西禮歸格于藝祖用特

疏舜既班瑞羣后即以  
歲二月東行巡省守土之

諸侯至于岱宗之嶽燔柴告至又望而以秩次祭于其  
方岳山川柴望既畢遂以禮見東方諸侯國之君巡守  
既周乃歸京師至于文祖之廟用特牛設祭以告巡守  
歸至也王者所為巡守者以諸侯自專一國威福在已  
恐其擁遏上命澤不下流故時自巡行問民疾苦孟子  
稱晏子對齊景公云天子適諸侯曰巡守巡守者巡所  
守也是言天子巡守主謂巡行諸侯故言  
諸侯為天子守土故稱守而往巡行之

蔡氏沈曰歲二月當巡守之年二月也

文中子叔恬曰舜一歲而巡五嶽國不費而民不勞  
何也曰無他道也兵衛少而徵求寡

敷奏以言明試以功車服以庸

蔡氏沈曰敷陳奏進也周禮曰民功曰庸程子曰敷奏以言者使各陳其為治之說言之善者則從而明考其功有功則賜車服以旌異之其言不善則亦有以告飭之也

蕙田案此舜巡狩之實事巡行所守專以考

察諸侯也

右虞巡狩之禮

路史炎帝之時后歲省方觀民設教月省時攷終歲

獻功

史記五帝本紀黃帝披山通道未嘗寧居東至于海  
登九山及岱宗西至于空桐登雞頭南至于江登熊  
湘北逐葷粥合符釜山

路史黃帝撫萬靈度四方乘龍而四巡東薄海禪九  
山西逾隴疑筭屯南入江內涉熊湘北居淳碣南臨  
元扈乃開東苑被中宮詔羣神授見者齋心服形以  
先焉作清角樂大合而樂之鳴鶴翺翔鳳凰蔽日于  
是合符于釜山以觀其會



史記五帝本紀帝顓頊北至于幽陵南至于交阯西至于流沙東至于蟠木幽靜之物小大之神日月所照莫不砥厲

路史帝乃乘結元之輦巡四海以寧民北嶺幽陵南  
據交阯西際神沙東踰蟠水四行天下周旋八外日  
芒所詭靡不砥厲 帝省方以齊民之物而登封以  
報其政之成是以四海同風九州共賞天下歸往而  
人以樂生

竹書紀年帝堯五年初巡狩四嶽

路史帝制五服均五等五國相維設四嶽八伯以典諸侯而臨民以十二春省耕秋省斂宣聲教以同俗振彫瘵聽民聲觀四履之所以化其上入其疆土地辟岐旁趨養老尊賢駿傑在位則有慶反是則絀

通鑑前編帝堯十有二載巡狩方嶽觀于華華封人曰嘻請祝聖人使聖人富壽多男子帝曰辭多男子則多懼富則多事壽則多辱封人曰天生萬民必授

之以職多男子則授之職何懼之有富而使人分之  
何事之有天下有道與物皆昌天下無道修德就閒  
千歲厭世去而上仙乘彼白雲至于帝鄉何辱之有  
通志五帝紀堯巡狩告成周流五岳存鰥寡賑荒札  
一民飢則曰我飢之一民寒則曰我寒之一民罹辜  
則曰我陷之故民戴之如日月愛之如父母不賞而  
勸不罰而治

三齊略記堯山在廣固城西七里堯巡狩所登遂以

為名山頂立祠祠邊有栢樹枯而復生不知幾代樹也又石上有堯跡于今猶存

蕙田案以上古巡狩附

周禮夏官職方氏王將巡守則戒于四方曰各修平乃

守考乃職事無敢不敬戒國有大刑

注乃猶汝也守謂國境之內職事所

當供具

王氏昭禹曰王巡守則諸侯各朝于方岳故戒于四方守則諸侯所守之地職事則諸侯所治之職事天子適諸侯曰巡守巡守者巡所守也故戒以修平乃守修則使之治其壤也平則使各當其分也諸侯朝

于天子曰述職述職者述所職也故戒以考乃職事職則慮其曠職事則慮其有廢事

鄭氏鐸曰因巡守之年儆戒之使修正其疆界攷察其職業以俟王之時巡告戒之有素及其不率然後待之以誅夷竄殛之罪可以無愧矣

李氏嘉會曰必先警戒而後巡守者不欲乘其不備幾于不戒而殺也必先警戒則刑可施

及王之所行先道帥其屬而巡戒令

注先道先由王所從道居前其前

日所戒之令

鄭氏鐸曰及王之所行先用所嚮之方國巡其前所布之戒令預攷其率與不率也

蕙田案以上巡狩先事戒令

禮記王制天子將出類乎上帝宜乎社造乎禴

注類宜造皆祭

名疏此論天子巡守之禮也將出謂初出時也類乎上帝祭告天也宜乎社者巡行方事誅殺封割應載社主令誅罰得宜亦隨宜而告也造乎禴者造至也謂至父祖之廟也前歸假既云祖禴明出亦告祖禴也今唯云禴者白虎通云從卑不敢留尊者之命至禴不嫌不至祖也

孔叢子巡守篇子思遊齊陳莊伯與登泰山見古天

子巡守之銘焉陳子曰敢問昔聖帝明王巡守之禮

可得聞乎子思曰古者天子將巡守必先告于祖禴

命史告羣廟及社稷圻內名山大川告者七日而徧

親告用牲史告用幣申命冢宰清道而出

白虎通德論王者出告廟何孝子出辭反面事死如  
事生尚書歸假于祖禰曾子問曰王者諸侯出親告  
祖禰使祝遍告五廟尊親也王者將出告天者示不  
專也故王制曰類于上帝宜乎社造乎禰類祭以祖  
配不曰接者尊無二禮尊尊之義造于禰獨見禰何  
辭從卑不復留尊者之命至禰不嫌不至祖即祭告  
天為告事也祖為出辭也義異告于尊者然後乃辭

出

朱子曰古者君將出必告于祖禰歸又至其廟而告之孝子不忍死其親出告反面之義也

陳氏澂曰類宜造皆祭名後章言天子將出征則此出為巡守也

蕙田案以上巡狩先事行告祭

曾子問曾子問曰古者師行必以遷廟主行乎孔子曰天子巡守以遷廟主行載于齊車言必有尊也今也取七廟之主以行則失之矣



陳氏澍曰遷廟主謂新祧廟之主也齊車金輅也又名曰公禰

吳氏澄曰遷廟主謂祔禰時所遷昭穆最上之廟一主也在昭廟穆廟之上最尊最親者也君將出行時徧告有廟之諸主又特告此無廟之一主而載之以行也

方氏慤曰齊車示有齊敬之心焉

曾子問曰古者師行無遷主則何主孔子曰主命問曰何謂也孔子曰天子諸侯將出必以幣帛皮圭告于祖禰遂奉以出載于齊車以行每舍奠焉而後就舍反必告設奠卒斂幣玉歲諸兩階之間乃出蓋貴命也

陳氏澔曰既以幣玉告于祖廟則奉此幣玉猶奉祖宗之命也故曰主命每舍必奠神之神也反則設奠以告而埋藏之不敢褻也

白虎通德論王者諸侯出必將主何示有所尊故曾子曰王者將出必以遷廟主行載于齊車示有尊也無遷主以幣帛皮圭告于祖禰廟遂奉以出每舍奠焉蓋貴命也必以遷主者明廟不可空也

蕙田案以上亦見孔叢子不複載

又案以上巡狩載主

周禮夏官戎僕掌馭戎車犯軼如玉路之儀

注戎車革路也

王氏昭禹曰王以兵出故有犯軼之儀

凡巡守及兵車之會亦如之

鄭氏諤曰出國門則跋履山川故行犯軼之祭

王氏昭禹曰凡巡守則戎車從焉兵車之會亦乘戎車異于乘車之會乘金路矣

大馭掌馭玉路以祀及犯軼

注行山曰軼封土為山于國門之外祭之以行為祖

道也

蕙田案以上巡狩犯軼

地官土訓掌道地圖以詔地事王巡守則夾王車

注道說也

說地圖九州形勢山川所宜告王以施其事也若云荆揚地宜稻幽并地宜麻巡守行視所守也天子以四海為守

呂氏溫曰見蒼梧塗山則思舜禹卹民之艱睹窮荒大漠則悟秦漢勞師之弊覽齊墟晉壤則想威文勤王之伯觀洞庭荆門則知苗蜀恃險之敗王者于此明得失諸侯于此鑒幽替斯懲勸之道也

王氏昭禹曰其地異宜其民異數其穀異種王將制其職貢巡其封域而物之有無事之利害莫不知之

則土訓之道地圖詔地事與有力焉

鄧氏元錫曰王體萬物不可使一物失所故博告之

誦訓掌道方志以詔觀事掌道方憲以詔辟忌以知地

俗王巡守則夾王車

注道方志說四方所識久遠之事以告王觀博古所識若魯有大庭

氏之庫殺之二陵方隱四方言語所忌也不辟其忌則其方以為苟于言語也知地俗博事也鄭司農云以詔

辟忌不違其俗也曲禮曰君子行禮不求變俗

魏氏校曰地氣有偏不能無隱天常生物解之西北多風防風獨活之屬足理風東南多痺魚鱉螺蜆之屬足治痺江湖多氣橘柚之屬足破氣嶺海多瘴檳榔之屬足去瘴是矣王所至恐不習水土預求物以防患非若後世但求口腹玩好也

蕙田案鄭注以方憲為言語之忌莊渠魏氏

以為食物之忌二說不同皆通

又案以上巡狩車行之儀

周禮夏官校人凡將事于四海山川則飾黃駒

注四海猶四方

也王巡守過大山川則有殺駒以祈沈禮與玉人職有宗祝以黃金勺前馬之禮疏謂王行所過山川設祭禮之然後去山川地神土色黃故用黃駒也

鄭氏謬曰若有祭祀于四海山川則必擇黃色之駒加文飾以將事焉此皆校人之職或謂大宗伯以沈豕祭川澤而祭祀之牲各放其色四海山川乃均用黃駒何耶以玉人之職攷之王巡守過大山川所用之璋不同然皆以王金勺前馬則知均用黃駒者海與山川均為地道黃者地之中色若夫用駒則以巡

守而行四方駒有千里之足而行地莫如馬駒雖馬之小者禮以小為貴飾黃駒乃郊用犢之意

冬官考工記玉人大璋中璋九寸邊璋七寸射四寸厚寸黃金勺青金外朱中鼻寸衡四寸有縹天子以巡守

宗祝以前馬

注射琰出者也杜子春云勺謂酒尊中勺也鄭司農云鼻謂勺龍頭鼻也衡謂勺柄

龍頭也元謂鼻勺流也凡流皆謂龍口也衡橫也謂勺徑也三璋之勺形如圭瓚天子巡守有事山川則用灌焉於大山川則用大璋加文飾也于中山川用中璋殺文飾也于小山川用邊璋半文飾也其祈沈以馬宗祝亦執勺以先之禮王過大山川則太祝用事焉將有事於四海山川則校人飾黃駒疏此經說王巡守出行過山川禮敬之事三璋據為勺柄黃金勺以下據為勺頭山川地神故用黃駒也

林氏曰宗主禮者祝通神者

孔叢子巡守所經五岳四瀆皆有牲幣

蕙田案以上巡狩所經岳瀆

禮記祭義王者巡守諸侯待于境

白虎通德論王者巡守諸侯待于境何諸侯以守蕃為職也故待于境

蕙田案此條亦見孔叢子不複載

又案以上巡狩諸侯待境



王制東巡守至于岱宗柴而望祀山川

注柴祭天告至也疏謂燔柴

以祭上天而告至其祭天之後乃望祀山川所祭之天則蒼帝靈威仰

方氏慤曰天之高也故燔柴以上達山川之遠故望而祀之皆告至也神祇衆矣止以山川蓋諸侯祭名山大川之在其地者其所守山川為大也天曰神地曰祇此以山川者其無所屈皆可謂神其無所別皆可謂祇也

郊特牲天子適四方先柴

周氏謂曰天子巡狩至于四嶽先柴以告天也

禮器因天事天因地事地因名山升中于天

陳氏澔曰名猶大也升上也中猶成也謂巡守至于方嶽燔柴祭天告以諸侯之成功也

曲禮臨諸侯畛于鬼神曰有天王某甫

陳氏澔曰天子巡守而至諸侯之國必使祝史致鬼神當祭者之祭以不親往故祝辭稱字曰某甫甫者

大夫之美稱也

方氏慤曰望秩之禮必于野外故以畛言之畛田間道也祭于畛而謂之畛猶祭于郊而謂之郊也天子適諸侯非其常蓋有時矣故于是特言有焉

詩周頌序時邁巡狩告祭柴望也

時邁其邦昊天其子之實右序有周薄言震之莫不震

疊懷柔百神及河喬嶽允王維后明昭有周式序在位  
載戢干戈載櫜弓矢我求懿德肆于時夏允王保之

朱子集傳周制十有二年王巡狩殷國柴望祭告諸  
侯畢朝此巡守而朝會祭告之樂歌也

般巡狩而祀四岳河海也

於皇時周陟其高山墮山喬岳允猶翕河敷天之下裒  
時之對時周之命

朱子集傳言美哉此周也其巡狩而登此山以柴望

又道于河以周四岳凡以敷天之下莫不有望於我  
故聚而朝之方岳之下以答其意耳

曹氏曰時邁為武王巡  
守之頌則般頌成王矣

蕙田案以上巡狩柴望

周禮天官掌舍掌王之會同之舍設櫜柅再重設車宮  
轅門為壇壝宮棘門為帷宮設旌門無宮則共人門凡  
舍事則掌之

夏官土方氏王巡守則樹王舍

易氏祓曰樹植也立也王巡守則有四方之舍土方氏既為之土地相宅而知利害之所在然後掌舍為之設控桓再重為車宮轅門為壇墻宮棘門而土方氏植立之焉

### 蕙田案以上巡狩設舍

禮記王制覲諸侯

注覲見也

疏覲見也謂見東方諸侯其見之禮案覲禮云諸侯覲于天

子為宮方三百步四門壇十有二尋深四尺鄭注云王巡守至于方嶽之下諸侯會之亦為此宮以見之是也  
覲禮又云天子乘龍載大旂拜日于東門之外反祀方明鄭注引朝事儀曰天子冕而執鎮圭尺有二寸云帥諸侯而朝日于東郊所以教尊尊也退而朝諸侯由此二者言之已祀方明乃以會同之禮見諸侯也凡會同者不協而盟盟時設方明於壇上乃以載辭告焉如覲禮及鄭注所云既告至之後為宮加方明於壇天子出

宮東門外拜日反祀方明祀方明之後乃徹去方明故鄭云由此二者言之已祀方明乃以會同之禮見諸侯云二者謂覲禮經文朝日東門反祀方明朝事儀云朝日東郊退而朝諸侯故云由此二者言之已祀方明乃以會同之禮見諸侯也今於覲禮未祀方明之前已有諸侯非也見諸侯之事皇氏以爲未祀方明之前已有諸侯非也其祀方明之後見諸侯之時王升立于壇上南面諸公中階之前北面諸侯東階之東西面諸伯西階之西東面諸子門東北面諸男門西北面王降階南面而見之三揖既升壇使諸侯升公拜於上等侯伯于中等子男于下等見諸侯訖若有不協更加方明於壇上諸侯等俱北面戎右傳敷血以授敵者司盟主其職故司盟云掌其盟約之載及其禮儀北面詔明神于時王立無文不可與諸侯同北面當於阼階上西面此是見諸侯之禮祀方明之時祭天則燔柴也天謂日也與此岱宗柴所用事別覲禮云祭天燔柴謂天子之盟也祭地瘞謂

王官之伯盟也祭山丘陵升及祭川沈者是諸侯之盟也此是巡守及諸侯之盟祭也故注云升沈必就祭者也就祭則是謂王巡守及諸侯之盟祭也祭天柴謂祭日也祭地瘞者祭月也王巡守之盟其神主曰諸侯之盟其神主山川則王官之伯會諸侯而盟其神主月與今此王制所主岱宗柴者謂祭天告至而覲禮注引王制云王巡守至于岱宗柴是王巡守之盟其神主日又以柴為盟之所用不同者告至與盟必非一事鄭意證巡守盟時有柴故引岱宗以證之其實別也覲禮云為宮即言加方明經文相連鄭注云王巡狩至于方嶽之下諸侯會之前為此宮則亦有方明但文不具耳故巡守祭天燔柴祭地瘞埋皆是祭方明也故鄭於方明設六玉之下注云上宜以蒼璧下宜以黃琮而不以者則上下之神非天地之至貴者也以此言之明天子巡守之祭有方明也而皇氏云諸侯來就王會同有方明王巡守見諸侯無方明皇氏用之為說其義非也

周禮秋官司儀掌九儀之賓客擯相之禮以詔儀容辭

令揖讓之節將合諸侯則令為壇三成宮旁一門

注合諸侯

謂有事而會也王巡守殷國而同則其為宮亦如此與

詔王儀南鄉見諸侯土揖

庶姓時揖異姓天揖同姓及其擯之各以其禮公於上

等侯伯於中等子男於下等其將幣亦如之其禮亦如

之

王氏曰古者天子巡守諸侯入朝一皆為壇於國門之外加方明焉天子示之蓋以為盟尸也此云合諸侯者謂大會同耳巡守之制亦如其會同但會同為壇于國門之外而巡守為壇于方岳之下耳有事而



會不協而盟此壇之所作也其制為壇三成即觀禮所云深四尺者是也蓋從下向上為深發地一尺上有三成則總四尺矣宮旁一門即觀禮所謂宮方三百步四門是也蓋墻土為壇壇外為宮每旁一門則四門矣

馬氏端臨曰天子與諸侯相見於方岳之下築壇與觀禮壇制同其壇外為土埽方三百步開四門壇方九十六尺高四尺上為堂下為三等謂之三成成每等高一尺其堂上置司盟之神位謂之方明見諸侯之時據鄭注司儀及觀禮諸侯之上介各以其君之旂置于宮內以表立位之處乃詔王升壇訖諸侯皆就其旂而立其位鄭案明堂位諸公中階之前北面東上諸侯阼階之東西面北上諸伯西階之西東面北上諸子門東北面西上諸男門西北面東上王乃於壇上揖之以定其位其揖之節有三儀與王無觀

者推手小下之與王婚姻之親者平推手揖之與王同姓者推手小舉之王既揖定其位諸侯乃進升壇奠玉又案司儀職及鄭注云公於上等奠桓珪王陳擯者五人禮之侯伯於中等奠信珪躬珪王陳擯者四人禮之子男於下等奠穀璧蒲璧王陳擯者三人諸侯各奠玉訖降拜又升成拜訖擯者乃延諸侯升堂授玉訖乃以璧琮行享禮謂之將幣諸侯既朝見王訖乃退而自相與盟王官之伯臨之其神主於月必因以祭之

蕙田案巡守見諸侯其儀多與覲禮同學者

當互參之

又案以上巡狩覲諸侯

白虎通德論王者巡狩必舍諸侯祖廟何明尊無二上也故禮坊記曰君適其臣升自阼階示不敢有其室也禮曰天子適諸侯必舍其祖廟王者出一公以其屬守二公以其屬從也

蕙田案此禮不見于經亦有可疑姑存之

又案以上巡狩舍諸侯祖廟

掌客掌四方賓客之牢禮餼獻飲食之等數與其政治王巡守殷國則國君膳以牲犢令百官百姓皆具從者

三公眡上公之禮卿眡侯伯之禮大夫眡子男之禮士

眡諸侯之卿禮庶子壹眡其大夫之禮

注政治邦新殺禮之屬國君者

王所過之國君也犢繭栗之犢也以膳天子貴誠也牲孕天子不食也祭帝不用也凡賓客則皆角尺令者掌客令主國也百牲皆具言無有不具備疏王巡守則殷同殷同則殷國也王巡守至于四嶽之下當方諸侯或所在經過或至方岳之下若殷國或在王城出畿外在諸侯之國所在之處皆設禮待王故巡守殷國並言也

易氏祓曰牢禮即凡用牢之禮饌謂饌九牢之類獻謂禽獻之類飲食謂享燕膳食之類

禮記郊特牲天子適諸侯膳用犢貴誠之義也

陳氏澔曰獮未有牝牡之情故云貴其誠慤

### 蕙田案以上巡狩諸侯致膳牲

王制問百年者就見之

注就見老人疏此謂到方岳之下見諸侯之後問百年者就

見之若未至方岳于道路上有百年者則王亦先見之

祭義天子巡守諸侯待于竟天子先見百年者

注問其國君以

百年者所在而往見之

八十九十者東行西行者弗敢過西行東

行者弗敢過欲言政者君就之可也

注弗敢過者謂道經之則見之疏

此一節明尚齒貴老之義八十九十者未滿百歲不可一一就見若天子諸侯因其行次或東行西行至八十

九十者閭里之旁不敢過越而去必往就見之欲言政君就之者謂八十九十之人雖不當道路左右亦當共言論政教往就之可也

應氏鑄曰彼向東此向西彼西行此趨東是相違而不相值然必駐行反迂謁而見之不敢超越經過也

### 蕙田案以上巡狩見老人

王制命太師陳詩以觀民風命市納賈以觀民之所好

惡志淫好辟

注陳詩謂采其詩而視之市典市者賈謂物貴賤厚薄也質則用物貴淫則侈物貴

民之志淫邪則其所好者不正疏太師是掌樂之官令各陳其國風之詩以觀君政之善惡命典市之官進納物賈之書以觀民所好惡若民志淫邪則好邪僻之物由在上教之不正此以民俗知君上善惡也

蕙田案以上巡狩觀察風俗

命典禮考時月定日同律禮樂制度衣服正之

注同陰律也

疏典禮之官於周則太史也考校四時及十二月之大小時有節氣早晚月有弦望晦朔考之使各當其節又正定甲乙之日陰管之同陽管之律玉帛之禮鐘鼓之樂及制度衣服各有等差當正之使正云同陰律者鄭以先儒以同為齊同此律故辨之太師云執同律以聽軍聲又典同注云同陰律也不以陽律名官者因其先耳言

蕙田案陸氏釋文載王肅尚書註以同為齊

孔疏因之康成以同為陰律二說不同穎達

作禮記疏即與書疏異解似王說較直捷

又案以上巡狩考正制度

山川神祇有不舉者為不敬不敬者君削以地宗廟有不順者為不孝不孝者君絀以爵變禮易樂者為不從不從者君流革制度衣服者為畔畔者君討有功德于

民者加地進律

注舉猶宗也不順者謂若逆昭穆流放也討誅也律法也疏文二年秋八月

丁卯大事于太廟躋僖公逆祀也左傳曰夏父弗忌為宗伯曰吾見新鬼大故鬼小先大後小順也于是躋僖

公于閔公之上是逆昭穆也



陳氏澂曰律者爵命之等  
加地而進之所以示勸也

### 蕙田案以上巡狩賞罰黜陟

南巡狩如東巡狩之禮西巡狩如南巡狩之禮北巡狩

如西巡狩之禮歸格于祖禰用特

注假至也特特牛也  
祖下及禰皆一牛

程子曰但止就祖廟共用一牛不如時祭各于其廟  
也

呂氏祖謙曰巡狩而歸苟民物有一不得其所其見  
祖廟有愧心矣想先王歸格之時此心無愧對越在  
廟慰愜  
可知也

陳氏澍曰假至也歸至京師  
即以特牛告至于祖禰之廟

蕙田案尚書但言祖禮記蕙言禰文有詳略  
其禮一也

孔叢子巡守歸反舍于外次三日齋親告于祖禰用  
特命有司告羣廟社稷及圻內名山大川而後入聽  
朝

蕙田案以上巡狩歸告廟

竹書紀年武王十五年初巡方岳誥于涿邑

通鑑前編武王十有五年春巡狩方岳祀百神朝諸侯

書周官惟周王撫萬邦巡侯甸四征弗庭綏厥兆民六服羣辟罔不承德歸于宗周

通鑑前編成王十有二年巡狩朝諸侯于方岳因行黜陟之典

竹書紀年成王十九年王巡狩侯甸方岳召康公從歸于宗周遂正百官黜豐侯

康王十六年王南巡守至九江廬山

通典昭王德哀南巡濟于漢船人惡之以膠船進王  
王御船至中流膠液船解王及祭公俱沒于水而崩  
其右卒游靡長臂且多力游得王周人諱之

穆天子傳周穆王守滲澤得白狐元貉以濟河宗得  
驥溫驪騶耳之駟西巡守樂而忘歸

蕙田案穆天子傳文多荒誕未必紀實其事  
亦見史記秦本紀今存其略不詳及

竹書紀年宣王八年巡狩東都

朱子詩車攻集傳周公相成王營洛邑為東都以朝諸侯周室既衰久廢其禮至于宣王內修政事外攘夷狄復文武之境土修車馬備器械復會諸侯于東都因田獵而選車徒焉故詩人作此以美之

春秋莊公二十一年左氏傳夏五月王巡虢守虢公為王宮于珽王與之酒泉鄭伯之享王也王以后之輦鑑與之虢公請器王子之爵鄭伯由是始惡于王

冬王歸自虢


春秋僖公二十有八年冬天王狩于河陽 左氏傳是會也晉侯召王以諸侯見且使王狩仲尼曰以臣召君不可以訓故書曰天王狩于河陽言非其地也且明德也

史記周本紀二十年晉文公召襄王襄王會之河陽踐土諸侯畢朝書諱曰天王狩于河陽

蕙田案周禮所載周巡狩之儀甚詳其他禮

記王制及見于各傳記者或兼夏殷巡狩之  
典然別無所考今統入周制

右周巡狩之禮



五禮通考卷一百七十八



欽定四庫全書

經部

五禮通考卷一百七十九

詳校官太常寺少卿<sub>臣</sub>陳桂森

給事中<sub>臣</sub>溫常綬覆勘

總校官進士<sub>臣</sub>繆琪

校對官中書<sub>臣</sub>王鍾泰

謄錄監生<sub>臣</sub>張士環

欽定四庫全書

五禮通考卷一百七十九

刑部尚書秦蕙田撰

嘉禮五十二

巡狩

史記秦始皇本紀始皇二十七年巡隴西北地出雞頭

山過回中焉賜爵一級治馳道

應劭曰馳道天子道也若今之中道然

二十八年始皇東行郡縣上鄒嶧山立石遂上泰山立

石禪梁父刻所立石乃並勃海以東過黃腫窮成山登之累立石頌秦德焉而去南登瑯琊大樂之留三月乃徙黔首三萬戶瑯琊臺下復十二歲作瑯琊臺立石頌德還過彭城齋戒禱祠欲出周鼎泗水使千人沒水求之不得乃西南渡淮水之衡南郡浮江至湘山祠自南郡由武關歸二十九年始皇東遊登之罘刻石之瑯琊道上黨入三十二年始皇之碣石刻碣石門巡北邊從上郡入三十七年始皇出遊行至雲夢望祀虞

舜於九疑山浮江下觀籍渡海渚過丹陽至錢塘臨浙  
江水波惡乃西百二十里從狹中渡上會稽祭大禹望  
於南海而立石頌秦德還過吳從江乘渡並海上北至  
瑯琊自瑯琊北至榮成山至之罘並海西至平原津  
二世元年東行郡縣到碣石並海南至會稽盡刻始皇  
所立刻石遂至遼東而還

右秦

漢書高祖本紀高祖二年冬十月如陝鎮撫關外父老

文帝本紀三年夏五月上幸甘泉自甘泉之高奴因幸  
太原見故羣臣皆賜之舉功行賞諸民里賜牛酒復晉  
陽中都民三歲租留游太原十餘日秋七月上自太原  
至長安 十年冬行幸甘泉 十一年冬十一月行幸  
代春正月上自代還 十五年夏四月上幸雍  
景帝本紀景帝中六年冬十月行幸雍

武帝本紀武帝元光二年冬十月行幸雍 六年夏六  
月行幸雍

元狩元年冬十月行幸雍

元鼎四年冬十月行幸雍賜民爵一級女子百戶牛酒  
行自夏陽東幸汾陰十一月行幸滎陽還至洛陽 五  
年冬十月行幸雍遂踰隴登空同西臨祖厲河而還

元封元年冬十月詔曰南越東甌咸伏其辜西蠻北夷  
頗未輯睦朕將巡邊垂擇兵振旅躬秉武節置十二部  
將軍親帥師焉行自雲陽北歷上郡西河五原出長城  
北登單于臺至朔方臨北河勒兵十八萬騎旌旗徑千

餘里威振匈奴還祀黃帝於橋山迺歸甘泉春正月行幸緱氏遂東巡海上夏四月癸卯上還登封泰山降坐明堂詔行所巡至博奉高蛇丘歷城梁父民田租逋賦貸已除加年七十以上孤寡帛人二匹四縣無出今年算賜天下民爵一級女子百戶牛酒行自泰山復東巡海上至碣石自遼西歷北邊九原歸於甘泉二年冬十月行幸雍春幸緱氏遂至東萊夏四月還至瓠子臨決河命從臣將軍以下皆負薪塞河隄作瓠子之歌赦

所過徒賜孤獨高年米人四石 四年冬十月行幸雍  
通回中道遂北出蕭關歷獨鹿鳴澤自代而還幸河東  
春三月詔赦汾陰夏陽中都死罪以下賜三縣及楊氏  
皆無出今年租賦 五年冬行南巡狩至于盛唐登潛  
天柱山自尋陽浮江親射蛟江中獲之舳艫千里薄樅  
陽而出作盛唐樅陽之歌遂北至琅琊並海所過禮祠  
其名山大川春三月還至泰山增封因朝諸侯王列侯  
受郡國計夏四月詔赦天下所幸縣毋出今年租賦賜



鰥寡孤獨帛貧窮者粟還幸甘泉 六年冬行幸回中

春作首山宮三月行幸河東

太初元年冬十月行幸泰山十二月禮高里東臨勃海

望祀蓬萊春還受計于甘泉 三年春正月行東巡海上

天漢元年春正月行幸甘泉三月行幸河東 二年春

行幸東海還幸回中 三年春三月行幸泰山還幸北

地夏四月赦天下行所過毋出田租

太始二年春正月行幸回中 三年春正月行幸甘泉

宮享外國客二月令天下大酺五日行幸東海獲赤雁  
作朱雁之歌幸琅琊禮日成山登之罘浮大海山稱萬  
歲冬賜行所過戶五千錢鰥寡孤獨帛人一匹 四年  
春三月行幸泰山夏四月幸不其祠神人於交門宮若  
有鄉坐拜者作交門之歌五月還幸建章宮大置酒赦  
天下十二月行幸雍西至安定北地

征和三年春正月行幸雍至安定北地 四年春正月  
行幸東萊臨大海三月上耕鉅定還幸泰山夏六月還

幸甘泉

後元元年春正月行幸甘泉遂幸安定

宣帝本紀神爵元年春正月行幸甘泉三月行幸河東  
元帝本紀永光五年冬上幸長楊射熊館

成帝本紀永始四年春正月行幸甘泉三月行幸河東  
蕙田案王莽傳載天鳳元年莽巡狩事今削  
不錄

右漢

後漢書世祖本紀建武三年冬十月壬申幸舂陵置酒  
舊宅大會故人父老十一月乙未至自舂陵 四年夏  
四月丁巳幸鄴己巳進幸臨平五月進幸元氏辛巳進  
幸盧奴六月辛亥車駕還宮七月丁亥幸譙八月戊午  
進幸壽春冬十月甲寅車駕還宮十一月丙申幸宛十  
二月丙寅進幸黎丘 九年夏六月丙戌幸緱氏登轅  
轅 十七年夏四月乙卯南巡狩皇太子及右翊公輔  
楚公英東海公陽濟南公康東平公蒼從幸潁川進幸

葉章陵五月乙卯車駕還宮 十八年春二月甲寅西  
巡狩幸長安 十九年秋九月南巡狩壬申幸南陽進  
幸汝南南頓縣舍置酒會賜吏人復南頓田租歲父老  
前叩頭言皇考居此日久陛下識知寺舍每來輒加厚  
恩願賜復十年帝曰天下重器常恐不任日復一日安  
敢遠期十歲乎吏人又言陛下實惜之何言謙也帝大  
笑復增一歲進幸淮陽梁沛 二十年春二月戊子車  
駕還宮冬十月東巡狩甲午幸魯進幸東海楚沛國十

二月壬寅車駕還宮復濟陽縣徭役六歲 三十年春  
二月東巡狩甲子幸魯進幸濟南閏月癸丑車駕還宮  
秋七月丁酉幸魯國復濟陽縣是年徭役冬十一月丁  
酉至自魯

中元元年春正月丁卯東巡狩二月己卯幸魯進幸泰  
山北海王興齊王石朝於東岳夏四月癸酉車駕還宮  
己卯改年為中元行幸長安戊子祀長陵五月乙丑至  
自長安

明帝本紀永平二年冬十月甲子西巡狩幸長安歷覽館邑會郡縣吏勞賜作樂十一月進幸河東所過賜二千石令長以下至於掾史各有差癸卯車駕還宮五年冬十月行幸鄴與趙王栩會鄴六年冬十月行幸魯會沛王輔楚王英濟南王康東平王蒼淮南王延琅邪王京東海王政十二月還幸陽城壬午車駕還宮

十年夏閏四月甲午南巡狩幸南陽日北至又祠舊宅禮畢召校官弟子作雅樂奏鹿鳴帝自御埴篪和之以

娛嘉賓還幸南頓勞享三老官屬冬十月徵淮陽王延  
會平與徵沛王輔會睢陽十二月甲午車駕還宮 十  
三年夏四月辛巳行幸滎陽巡幸河渠乙酉詔曰今五  
土之宜反其正色濱渠下田賦與貧人無令豪右得固  
其利因遂渡河登太行進幸上黨壬寅車駕還宮 十  
五年春二月庚子東巡狩辛丑幸偃師徵沛王輔會睢  
陽進幸彭城癸亥帝耕于下邳三月徵琅邪王京會良  
城徵東平王蒼會陽都又徵廣陵侯及其三弟會魯還



幸孔子宅親御講堂命皇太子諸王說經又幸東平辛卯途幸大梁至定陶夏四月庚子車駕還宮

章帝本紀建初七年秋九月甲戌幸偃師東涉卷津至河內下詔曰車駕行秋稼觀收穫因涉郡界皆精騎輕行無它輜重不得輒修橋道遠離城郭遣吏逢迎刺探起居出入前後以為煩擾動務省約但患不能脫粟瓢飲耳所過欲令貧弱有利無違詔書遂覽淇園已酉進幸鄴勞享魏郡守令以下至于三老門闌走卒賜錢各

有差勞賜常山趙國吏人復元氏祖賦三歲辛卯車駕  
還宮冬十月癸丑西巡狩幸長安進幸槐里岐山得銅  
器形似酒罇獻之又獲白鹿帝曰上無明天子下無賢  
方伯人之無良相怨一方斯器亦曷為來哉又幸長平  
御池陽宮東至高陵造舟于涇而還每所到幸輒會郡  
縣吏人勞賜作樂十一月詔勞賜河東守令掾以下十  
二月丁亥車駕還宮 八年冬十二月甲午東巡狩幸  
陳留梁國淮陽潁陽戊申車駕還宮

元和元年秋八月丁酉南巡狩詔所經道上郡縣無得  
設儲待命司空自將徒支柱橋梁有遣使奉迎探知起  
居二千石當坐其賜鰥寡孤獨不能自存者粟人五斛  
九月辛丑幸章陵祠舊宅園廟見宗室故人賞賜各有  
差冬十月己未進幸江陵還幸宛十一月己丑車駕還  
宮賜從者各有差 二年春二月丙辰東巡狩乙丑帝  
耕于定陶詔曰三老尊年也孝悌淑行也力田勤勞也  
國家甚休之其賜帛人一匹勉率農功辛未幸太山進

幸奉高癸酉大會內外羣臣丙子詔大赦天下諸犯罪  
不當得赦者皆除之復博奉高羸無出今年田租芻橐  
戊寅進幸濟南三月己丑進幸魯壬辰進幸東平乙未  
幸東阿北登太行山至天井關夏四月乙卯車駕還宮  
張酺傳顯宗置五經師酺以尚書教授數講于御前  
遂令入授皇太子及肅宗即位數月出為東郡太守  
元和二年東巡狩幸東郡引酺及門生并郡縣掾吏  
並會庭中帝先備弟子之儀使酺講尚書一篇然後

修君臣之禮賞賜殊特莫不沾洽

章帝本紀元和三年春正月丙申北巡狩濟南王康中山王焉西平王羨六安王恭樂成王黨淮陽王昞任城王尚沛王定皆從辛丑帝耕于懷二月壬寅告常山魏郡清河鉅鹿平原東平郡太守相曰朕惟巡狩之制以宣聲教考同遐邇解釋結冤也今四國無政不用其良駕言出游欲親知其劇易前祠園陵遂望祀華霍東柴岱宗為人祈福今將禮常山遂徂北土歷魏郡經平原

升踐隄防詢訪耆老咸曰往者汴門未作深者成淵淺則泥塗追惟先帝勤人之德底績遠圖復禹宏業聖跡滂流至于海表不克堂構朕甚慙焉月令孟春善相丘陵土地所宜令肥田尚多未有墾闢其悉以賦貧民給與糧種務盡地力勿令游手所過縣邑聽半入今年田租以勸農夫之勞乙丑敕侍御史司空曰方春所過無得有所伐殺車可以引避引避之駢馬可輟解輟解之詩云敦彼行葦牛羊勿踐履禮人君伐一草木不時謂

之不孝俗知順人莫知順天其明稱朕意戊辰進幸中山出長城癸酉還幸元氏三月丙子詔復元氏七年徭役己卯進幸趙辛卯車駕還宮賜從行者各有差八月乙丑幸安邑觀鹽池九月至自安邑

章和元年秋八月癸酉南巡狩甲申徵任城王尚會睢陽戊子幸梁乙未幸沛徵會東海王政九月庚子幸彭城東海王政沛王定任城王尚皆從辛亥幸壽春己未幸汝陰冬十月丙子車駕還宮

和帝本紀永元三年冬十月癸未行幸長安十五年  
九月壬午南巡狩清河王慶濟北王壽河間王開並從  
賜所過二千石長吏以下三老官屬及民百年者錢布  
各有差冬十月戊申幸章陵癸丑會宗室于舊廬勞賜  
作樂戊午進幸雲夢臨漢水而還十一月甲申車駕還  
宮賜從臣及留者公卿以下錢布各有差

張禹傳永元十五年南巡祠園廟禹以太尉兼衛尉  
留守聞車駕當進幸江陵以為不宜冒險遠驛馬上



諫詔報曰祠謁既訖當南禮大江會得君奏臨漢回  
輿而旋及行還禹特蒙賞賜

十六年十一月己丑行幸緱氏登百岯山賜百官從臣  
布各有差

安帝本紀延光三年春二月丙子東巡狩辛卯幸泰山  
齊王無忌北海王普樂安王延來朝癸巳勞賜郡縣作  
樂三月戊辰還幸東平至東郡歷魏郡河內壬戌車駕  
還京師冬十月行幸長安丁亥會三輔守令掾吏于長

安作樂閏月乙未歷觀上林昆明池十一月乙丑至自  
長安 四年春二月甲辰南巡狩

順帝本紀永和二年冬十月甲申行幸長安所過鰥寡  
孤獨貧不能自存者賜粟人五斛庚子幸未央宮會三  
輔郡守都尉及官屬勞賜作樂十二月乙亥至自長安  
桓帝本紀延熹二年冬十月壬申行幸長安乙酉幸未  
央宮十二月己巳至自長安賜長安民粟人十斛行所  
過縣三斛 七年冬十月壬寅南巡狩庚申幸章陵賜

守令以下各有差戊辰幸雲夢臨漢水還幸新野十二月辛丑車駕還宮

靈帝本紀光和五年冬十月校獵上林苑歷函谷關遂巡狩于廣成苑

右後漢

三國魏志文帝本紀黃初二年冬十二月行東巡三年春正月庚午行幸許昌宮三月甲午行幸襄邑夏四月癸亥行還許昌宮冬十一月辛丑幸宛四年春正

月築南巡臺于宛三月丙申行自宛還洛陽宮秋八月  
辛未東巡九月甲辰行幸許昌宮

晉書禮志黃初四年七月帝將東巡以大軍當出使  
太常以一特牛告祠南郊

五年秋七月行東巡幸許昌宮八月為水軍親御龍舟  
循蔡潁浮淮幸壽春揚州界將吏士民犯五歲刑以下  
皆原除之九月遂至廣陵赦青徐二州改易諸將守冬  
十月乙卯行還許昌宮六年春二月遣使者循行許

陵通討虜渠乙巳還許昌宮辛未帝為舟師東征五月  
戊申幸譙八月帝遂以舟師自譙循渦入淮從陸道幸  
徐九月築東巡臺冬十月行幸廣陵故城臨江觀兵戎  
卒千餘萬旌旗數百里是歲大寒水道冰舟不得入江  
乃引還十二月行自譙過梁

明帝本紀太和四年八月辛巳行東巡乙未幸許昌宮  
十月乙卯行還洛陽宮

晉書禮志魏明帝凡三東巡狩所過存問高年恤疾苦  
或賜穀帛齊王正始元年巡洛陽縣賜高年力田各有  
差

右魏

晉書武帝本紀泰始四年六月甲申朔詔曰郡國守相  
三載一巡行屬縣必以春此古者所以述職宣風展義  
也見長吏觀風俗協禮律考度量存問耆老親見百年  
錄囚徒理冤枉詳察政刑得失知百姓所患苦無有遠

近便若朕親臨之

通志晉初新禮巡狩方岳柴望告設壇宮如禮諸侯之  
覲者賓及執贄皆如朝儀而不建旗摯虞以覲禮諸侯  
各建其旗章所以殊爵命示等威詩稱君子至止言觀  
其旗宜定新禮建旗如舊詔可然終晉代不行其禮武  
帝泰始四年詔使使持節侍中黃門侍郎銜命四出周  
行天下其萬民之害為一書禮俗政事教理刑禁逆順  
為一書悖逆暴亂作慝犯令為一書札喪荒凶厄貧為

一書康樂和親安平為一書每國辨異之以反命于王  
蕙田案此後世遣使代巡之始

右晉

宋書文帝本紀元嘉四年二月東巡狩至于丹徒三月  
享會父老舊勲于行宮加賜衣裳幣帛蠲租原刑戰亡  
之家及單孤並隨宜隱卹二十六年二月東巡幸至  
京城會舊京故老萬餘人享勞賚發赦蠲徭役

孝武帝本紀大明七年春二月甲寅車駕巡南豫南兗



二州丁巳車駕校獵于歷陽之烏江己未車駕登烏江  
縣六合山壬寅詔曰朕受天慶命十一年於茲矣憑七  
廟之靈獲上帝之力禮橫四海威震八荒方巡三湘而  
奠衡岳次九河而檢云岱今恢覽功成省風畿表觀民  
六合蒐校長洲騰沙飛礫平岳盪海鼓晉合序銃鈺協  
節獻鬯如禮饁獸傾郊敬舉王公之觴廣納士民之壽  
八風循通卿雲叢聚盡天聲瑞率宇竭歡思散大極之  
泉以福無方之外可大赦天下行幸所無出今歲租布

其逋租餘債勿復收賜民爵一級女子百戶牛酒刺守  
邑宰及民夫從蒐者普加洽賚又詔曰朕弱年操製出  
牧司雍承政宣風荐歷年紀國步中阻治戎江甸難夷  
情義實繫于懷今或練蒐訓旅涉茲境間故邑耆舊在  
日罕存年世未遠殲亡大半撫迹惟事傾慨兼著太宗  
燕故晉陽洽恩世祖流仁濟畿暢澤永言往猷思廣前  
賚可蠲歷陽郡租輸三年遣使巡慰問民疾苦鰥寡孤  
老六疾不能自存者厚賜粟帛高年加以羊酒凡一介

之善隨才銓貫前國名臣及府州佐吏量所沾錫人身  
已往施及子孫壬申車駕還宮秋九月戊子詔曰昔周  
王驥迹實窮四溟漢帝鸞軫夙徧五岳是皆所以上對  
幽靈下理民土自天昌替馭臨宮創圖禮代天鬱世賀  
興毀皇家造宋日月重光璇璣得序五星順命而戎車  
歲動陳詩義闕朕聿含五光奄一天下思盡寶戒之規  
以塞謀危之路當沿時省方觀察風俗外詳考舊典以  
副側席之懷冬十月戊申車駕巡南豫州詔曰朕巡幸

所經先見百年者及孤寡老疾並賜粟帛獄繫刑罪並  
親聽訟其士庶或怨鬱危滯受抑吏司或隱約潔立負  
擯州里皆聽進朕前面自陳訴若忠信孝義力田殖穀  
一介之能一藝之美悉加旌賞雖秋澤頻降而夏旱嬰  
弊可即開行倉並加賑賜癸丑行幸江寧縣訊獄囚丙  
寅詔曰賞慶刑威奄國彞軌黜幽升明闕寓恒憲故採  
言聆風式觀侈質貶爵加地于是乎在今類帝宜社親  
巡江甸因覲嶽守躬求民瘼思宏明試之典以申考績

之義行幸所經蒞民之職功宣于聽即加甄賞若廢務亂民隨詈議罰主者詳察以聞己巳車駕校獵于姑熟十一月丙子曲赦南豫州殊死以下巡幸所經詳減今歲田租乙酉上于行所訊漂陽永世丹陽縣囚癸巳車駕習水軍於梁山有白爵二集華蓋有司奏改大明七年為神爵元年詔不許乙未原放行獄徒繫東諸郡大獄壬寅遣使開倉貸卹聽受雜物當租十二月丙午行幸歷陽甲寅大赦天下南豫州別署勅繫長徒一切原

散其兵期考襲謫戍悉停歷陽郡女子百戶牛酒高年  
孤疾賜帛十匹蠲郡租十年癸亥車駕至自歷陽

魏書昭成帝本紀建國十二年西巡至河而還 十九  
年二月帝西巡因而臨河使人招喻關頭從命 二十  
二年春帝東巡至于桑乾川夏四月還雲中 二十五  
年帝南巡至君子津冬十月行幸代

道武帝本紀登國二年冬十月癸卯幸濡源十一月遂  
幸赤城十二月巡松漠還幸牛川 三年春二月帝東

巡夏四月幸東赤城六月渡弱落水班賞將士各有差  
秋七月帝還赤城 七年秋八月行幸漠南仍築巡臺  
八年春正月帝南巡二月幸殺羊原赴白樓夏六月  
車駕北巡秋七月臨幸新壇庚寅宴羣臣仍講武九月  
還幸河南宮 九年春三月帝北巡夏五月田于河東  
秋七月還幸河南宮

天興元年春正月庚子車駕自中山行幸常山之真定  
次趙郡之高邑遂幸于鄴民有老不能自存者詔郡縣

賑恤之帝至鄴巡登臺榭遍覽宮城將有定都之意乃  
置行臺以龍驤將軍日南公和跋為尚書與左丞賈彝  
率郎吏及兵五千人鎮鄴車駕自鄴還中山所過存問  
百姓詔大軍所經州郡復貲租一年除山東民租賦之  
半辛酉車駕發自中山至于望都堯山次于恒山之陽  
二月車駕自中山幸繁峙宮 三年夏五月己巳車駕  
東巡遂幸涿鹿西幸馬邑觀灋源秋七月壬子車駕還  
宮 六年秋七月戊子車駕北巡築離宮于豺山縱士



校獵東北踰罽嶺出參合代谷九月行幸南平城規度  
澠南面夏屋山背黃瓜堆將建新邑辛未車駕還宮

天賜三年春正月甲申車駕北巡幸豺山宮二月乙亥  
幸代園山建五石亭三月庚子車駕還宮夏四月庚申  
幸馬城甲戌車駕還宮秋八月甲辰行幸豺山宮遂至  
青牛山丙申西登武要北原觀九十九泉造石亭遂之  
石漠九月甲戌朔幸漠南鹽池壬午至漠中觀天鹽池  
度漠北之吐鹽池癸巳南還長川丙申臨觀長陂冬十

月庚申車駕還宮 四年夏五月北巡自參合陂東過  
蟠羊山大雨暴水流輜重數百乘殺數百人遂東北踰  
石漠至長川幸濡源西幸參合陂築北宮垣三旬而罷  
乃還宮

明元帝本紀永興四年秋九月己巳朔東巡己卯大獵  
于石會山戊子臨去畿陂觀漁庚寅至于濡源西巡幸  
北部諸落賜以繒帛八月庚戌車駕還宮壬子幸西宮  
臨板殿大享羣臣將吏以田獵所獲賜之冬十有二月

丁巳車駕北巡至長城而還 五年夏四月乙卯車駕  
西巡五月乙亥行幸雲中舊宮之大室六月酉幸五原  
校獵于骨羅山獲獸十萬秋七月己巳還幸薄山帝登  
觀太祖遊幸刻石頌德之處乃于其旁起石壇而薦享  
焉賜從者大酺于山下丙戌車駕自大室西南巡諸部  
落賜其渠帥繒帛有差遂南次定襄大落城東踰七嶺  
山田于善無川八月癸卯車駕還宮

神瑞二年夏四月己卯車駕北巡五月丁亥次于參合

東幸大甯丁未田于四岬山六月戊午幸去畿陂觀漁  
辛酉次于濡源築立螭臺射白熊于頽牛山獲之丁卯  
幸赤城親見長老問民疾苦復租一年南次石亭幸上  
谷問百年訪賢俊復田租之半壬申幸涿鹿登橋山觀  
溫泉至廣甯登歷山秋七月還宮復所過田租之半

泰常元年夏六月丁巳車駕北巡秋七月甲申帝自白  
鹿陂西行大獮于牛川登釜山臨殷繁水而南觀于九  
十九泉戊戌車駕還宮二年夏五月車駕西巡至于

雲中遂濟河田于大漠冬十有二月庚申田于西山癸亥車駕還宮 四年夏四月辛巳南巡幸雁門賜所過無出今年租賦五月庚寅朔觀漁于灋水己亥車駕還宮復所過一年租賦秋八月辛未東巡遣使祭恒岳甲申車駕還宮所過復一年田租冬十有二月癸亥西巡至雲中踰白道北獵野馬于辱孤山至于黃河從君子津西渡大狩于薛林山 七年春正月甲辰朔自雲中西行幸屋竇城賜從者大酺三日蕃渠帥繒帛各有差

二月丙戌車駕還宮賜從者布帛各有差秋七月乙巳幸灋南宮遂如廣寧辛酉幸橋山因東幸幽州見耆年問其所苦賜爵號分遣使者循行州郡觀風俗冬十月甲戌車駕還宮復所過田租之半壬辰車駕南巡出自天門關踰恒嶺四方蕃附大人各率所部從者五萬餘人八年春正月丙辰行幸鄴存恤民俗三月乙巳帝田于鄴南韓陵山幸汲郡至于枋頭乙卯濟自靈昌津幸陳留東郡乙丑濟河而北西之河內造浮橋于冶坂

津夏四月丁卯幸成臯城觀虎牢遂至洛陽觀石經閏  
月己未還幸河內北登太行幸高都辛酉還至晉陽班  
賜從官王公以下逮于厮賤無不霑給五月丙寅還次  
雁門皇太子率留臺王公迎于句注之北庚寅車駕至  
自北巡六月丙辰北巡至于參合陂遊于蟠羊山秋七  
月幸三會屋侯泉詔皇太子率百官以從八月幸馬邑  
觀于灑源九月乙亥車駕還宮

太武帝本紀始光元年夏四月甲辰東巡幸大寧

神麤元年夏四月壬子西巡戊午田于河西六月甲寅  
行幸長川秋七月車駕還宮八月東幸廣寧臨觀溫泉  
九月車駕還宮冬十月甲辰北巡壬子田于牛川二  
年冬十有一月西巡狩田于河西至祚山而還

文成帝本紀太安三年冬十月將東巡詔太宰常英起  
行宮于遼西黃山四年春正月乙卯行幸廣寧溫泉  
宮遂東巡平州庚午至于遼西黃山宮游宴數日親對  
高年勞問疾苦二月丙子登碣石山觀滄海大享羣臣



于山下班賞進爵各有差改碣石山為樂游山築壇記  
行于海濱戊寅南幸信都畋遊于廣川三月丁未觀馬  
射于中山所過郡國賜復一年丙辰車駕還宮冬十月  
甲戌北巡至陰山有故塚毀廢詔曰昔姬文葬枯骨天  
下歸仁自今有穿毀墳壠者斬之辛卯車駕次于車輪  
山累石記行

禮志和平元年正月帝東巡歷橋山幸遼西遂緣海西  
南幸冀州北至中山

孝文帝本紀延興二年閏六月戊午行幸陰山秋七月  
壬寅詔州郡縣各遣二人才堪專對者赴九月講武當  
親問風俗九月辛巳車駕還宮三年冬十有一月癸  
巳太上皇帝南巡至于懷州所過問民疾苦賜高年孝  
悌力田布帛

太和五年春正月己卯車駕南巡丁亥至中山親見高  
年問民疾苦二月辛卯朔大赦天下賜孝悌力田孤貧  
不能自存者穀帛有差免官人年老者還其所親丁酉

車駕幸信都存問如中山癸卯還中山己酉講于唐水  
之陽庚戌車駕還都三月辛酉朔車駕幸肆州癸亥講  
武于雲水之陽所經考察守宰加以黜陟己巳車駕還  
宮 十五年秋七月乙酉車駕巡省京邑聽訟而還

十六年春二月壬辰巡省京邑聽理冤訟三月丁卯巡  
省京邑 十七年八月壬寅車駕至肆州民年七十以  
上賜爵一級路見眇跛者停駕親問賜衣食終身戊申  
幸并州親見高年問所疾苦九月庚午幸洛陽 十有

八年春正月癸亥車駕南巡詔相充豫三州百年以上  
假縣令九十以上賜爵二級七十以上賜爵一級孤老  
鰥寡不能自存者賜粟五石帛二匹孝悌廉義文武應  
求者皆以名聞乙亥幸洛陽西宮二月己丑行幸河陰  
壬寅車駕北巡閏月癸亥次句注陘南皇太子朝于蒲  
池壬申至平城宮秋七月壬辰車駕北巡辛丑幸朔州  
八月癸卯皇太子朝于行宮甲辰行幸陰山觀雲川丁  
未幸閱武臺臨觀講武癸丑幸懷朔鎮己未幸武川鎮

辛酉幸撫寧鎮甲子幸柔元鎮乙丑南還所過皆親見  
高年問民疾苦貧寡孤老賜以粟帛丙寅詔六鎮及禦  
夷城人年八十以上而無子孫兄弟終身給其廩粟七  
十以上家貧者各賜粟十斛又詔諸北城人年滿七十  
以上及廢疾之徒校其元犯以準新律事當從坐者聽  
一身還鄉又令一子扶養終命之後乃遣歸邊自餘之  
處如此之犯年八十以上皆聽還戊辰車駕次旋鴻池  
辛未還平城宮冬十月辛亥車駕發平城宮壬戌次于

中山之唐湖乙丑分遣侍臣巡問民所疾苦己巳幸信都十有一月辛未朔詔冀定二州民百年以上假以縣令九十以上賜爵三級八十以上賜爵二級七十以上賜爵一級鰥寡孤獨不能自存者賜以穀帛孝義廉貞文武應求者具以名聞丁丑車駕幸鄴己丑車駕至洛陽二十有一年春正月乙巳車駕北巡二月壬戌次于太原親見高年問所不便乙丑詔并州士人年六十以上假以郡守癸酉車駕至平城癸未行幸雲中乙未

車駕南巡已酉次離石詔汾州民百年以上假縣令九十以上賜爵三級八十以上賜爵二級七十以上賜爵一級丙辰車駕次平陽夏四月庚申幸龍門癸亥行幸蒲坂辛未行幸長安乙亥親見高年問所疾苦丙子遣侍臣分省縣邑賑賜穀帛戊寅幸未央殿阿房宮遂幸昆明池己丑車駕東旋汎渭入河庚寅詔雍州士人百一年以上假華郡太守九十以上假荒郡八十以上假華縣令七十以上假荒縣庶老以年各減一等七十以上

賜爵三級其營船之夫賜爵一級孤寡鰥貧窮痾廢疾  
各賜帛二匹穀五斛其孝友德義文學才幹悉仰貢舉  
六月庚申車駕至長安

孝莊帝本紀永安二年夏五月甲戌車駕北巡乙亥幸  
河內戊寅詔上黨百年以下九十以上板三品郡八十  
以上四品郡七十以上五品郡秋七月庚午車駕入居  
華林園昇大夏門大赦天下

出帝本紀永熙二年冬十有二月丁巳車駕狩于嵩陽



己巳遂幸溫湯丁丑車駕還宮

北齊書文宣帝本紀天保三年夏六月乙卯帝如晉陽  
九月辛卯帝自并州幸離石冬十月乙未至黃櫨嶺仍  
起長城北至社干戍四百餘里立三十六戍十二月壬  
子帝還宮戊午帝如晉陽四年九月壬午帝北巡冀  
定幽安五年冬十二月庚申帝北巡至達速嶺覽山  
川險要將起長城九年夏六月乙丑帝自晉陽北巡  
己巳至祁連池戊寅還晉陽

北周書明帝本紀二年九月丁未幸同州過故邑賦詩  
曰玉燭調秋氣金輿歷舊宮還如過白水更似入新豐  
霜潭漬晚菊寒井落疎桐舉杯延故老令聞歌大風冬  
十月辛酉還宮

武帝本紀保定二年秋七月戊辰行幸原州丁丑幸津  
門問百年賜以錢帛又賜高年板職各有差九月甲子  
自原州登隴山丙戌幸同州冬十二月辛卯至自同州  
天和元年冬十一月丙戌行幸武功等新城十二月庚

申還宮

建德六年夏六月甲子帝東巡秋七月丙戌行幸洛州  
己丑詔山東諸州舉有才者上縣六人中縣五人下縣  
四人赴行在所共論治政得失冬十月戊申行幸鄴宮  
十二月庚申行幸并州宮

宣政元年春正月壬午行幸鄴宮辛卯行幸懷州癸巳  
幸洛州二月丁巳帝至自東巡

宣帝本紀大象元年春正月甲辰東巡狩戊午行幸洛

陽二月乙亥行幸鄴三月庚申至自東巡

右南北朝

隋書煬帝本紀大業元年三月詔曰聽採輿訟謀及庶民故能審刑政之得失今將巡歷淮海觀省風俗八月壬寅上御龍舟幸江都二年三月庚午車駕發江都四月庚戌自伊闕陳法駕備千乘萬騎入東京御端門大赦三年三月辛亥車駕還京師四月景申車駕北巡狩六月戊子次榆林郡丁酉啟民可汗來朝八月壬

午車駕發榆林癸巳入樓煩關壬寅次太原九月己未  
次濟源己巳至東都 四年三月車駕幸五原因出塞  
巡長城八月親祭恒岳河北道郡守畢集 五年三月  
車駕西巡河右四月癸亥出臨津關渡黃河五月庚辰  
入長寧谷壬午度星嶺六月癸卯經大斗拔谷景午次  
張掖戊午大赦天下行經之所給復二年九月癸未車  
駕入長安十一月景子車駕幸東都 六年三月癸亥  
幸江都宮 七年二月上自江都御龍舟入永濟渠遂

幸于涿郡 八年三月車駕度遼九月上至東都 九  
年四月車駕度遼九月車駕次上谷 十年三月行幸  
涿郡四月車駕次北平七月車駕次懷遠鎮丁卯上至  
東都已丑還京師十二月壬申上如東都 十一年五  
月幸太原避暑汾陽宮八月巡北塞十月上至東都  
十二年七月幸江都宮

右隋

唐書禮樂志天子將巡狩告于其方之州曰皇帝以某

月于某巡狩各修乃守考乃職事敢不敬戒國有常刑  
將發告于園丘前一日皇帝齋如郊祀告昊天上帝又  
告于太廟社稷具大駕鹵簿所過州縣刺史令候于境  
通事舍人承制問高年祭古帝王名臣烈士既至刺史  
令皆先奉見將作築告至園壇于嶽下四出陞設昊天  
上帝配帝位天子至執事皆齋一日明日望于嶽鎮海  
瀆山川林澤丘陵墳衍原隰所司為壇設祭官次于東  
壝門外道南北向設饌幔內壝東門外道北南向設宮

懸登歌為瘞瑤祭官執事皆齋一日嶽鎮海瀆山川林  
澤丘陵墳衍原隰之尊在壇上南陛之東北向設玉篚  
及洗設神座壇上北方獻官奠玉幣及爵于嶽神祝史  
助奠鎮海以下明日乃肆覲將作于行宮為壝三分壝  
間之二在南為壇于北廣九丈六尺高九尺四出陛設  
宮懸壇南御座壇上之北解劍席南陛之西文武官次  
門外東西刺史令次文官南蕃客次武官南列輦路壇  
南文官九品位壇東南武官西南相向刺史令位壇南



三分庭一蕃客位于西又設門外位建牙旗于壝外黃麾大仗屯門鉞戟陳壝中吏部主客戶部贊羣官客使就門外位刺史令贊其土之實錦綺繒布葛越皆五兩為束錦以黃帊常貢之物皆篚其屬執列令後文武九品先入就位皇帝乘輿入北壝門由北陞升壇即坐南向刺史蕃客皆入壝門至位再拜奠贊興執贊侍中降于刺史東北皆拜宣已又拜蕃客以舍人稱制如之戶部導貢物入刺史前龜首之金次之丹漆絲纊四海九

州之美物重行陳執者退就東西文武前側立通事舍  
人導刺史一人解劍脫烏執贄升前北向跪奏官封臣  
姓名等敢獻壤奠遂奠贄舍人跪舉以東授所司刺史  
劍烏復位初刺史升奠贄在庭者以次奠于位前皆再  
拜戶部尚書壇間北向跪請以貢物付所司侍中承制  
曰可所司受贄出東門中書侍郎以州鎮表方一案俟  
于西門外給事中以瑞案俟于東門外乃就侍臣位初  
刺史將入乃各引案分進東西陛下刺史將升中書令

黃門侍郎降立既升乃取表升尚書既請受贄中書令  
乃前跪讀黃門侍郎給事中進跪奏瑞侍郎給事中導  
案退文武刺史國客皆再拜北向位者出就門外位皇  
帝降北陛以入東西位者出設會如正至刺史蕃客入  
門皆奏樂如上公會之明日考制度太常卿採詩陳之  
以觀風俗命市納賈以觀民之好惡典禮者考時定日  
同律禮樂制度衣服正之山川神祇有不舉為不恭宗  
廟有不慎為不孝皆黜爵革制度衣服者為叛有討有

功德于百姓者爵賞之

舊唐書高宗本紀武德三年春正月辛巳幸蒲州

唐書太宗本紀貞觀四年秋九月己卯如隴州壬午禁  
芻牧于古明君賢臣烈士之墓者十月壬辰赦岐隴二  
州免今歲租賦降咸陽始平武功死罪以下乙卯免武  
功今歲租賦十一月甲子至自隴州十一年春二月  
甲子如洛陽宮乙丑給民百歲以上侍五人三月癸卯  
降洛州囚見徒免一歲租調九月丁亥河溢壞陝州河

北縣毀河陽中渾幸白司馬坂觀之賜頻河遭水家粟  
帛十一月辛卯如懷州丙午如洛陽宮 十二年二月  
癸亥如河北縣觀底柱乙丑如陝州丁卯觀鹽池庚午  
如蒲州甲戌如長春宮免朝邑今歲租賦降囚罪丙戌  
至自長春宮

冊府元龜貞觀十五年正月如洛陽次溫泉衛士崔卿  
刁文懿憚于行役冀鑿輿驚擾而停遂夜射行宮矢及  
寢院者五皆以大逆論已丑詔從行士卒家貧親老並

放還二月癸丑宴從官及山東宗姓洛陽年高于貞觀  
殿三月戊辰如襄城宮庚午罷襄城宮分賜百姓十月  
壬辰幸嵩陽辛丑還宮十一月壬申還京十二月戊子  
至自洛陽 十八年二月己酉幸零口村落偏側問其  
受田丁三十畝遂夜分而寢憂其不給詔府州錄尤少  
田者並給復移之于寬鄉乙卯還宮十一月壬申至洛  
陽宮壬午宴父老百九十人于儀鑾殿班賜有差

唐書太宗本紀貞觀二十年八月如靈州庚辰次涇州

賜高年鰥寡粟帛丙戌踰隴山關次瓦亭觀牧馬九月  
辛卯遣使巡察嶺南十月丙戌至自靈州

高宗本紀永徽五年三月戊午如萬年宮乙丑次鳳泉  
湯辛未赦岐州及所過徒罪以下八月己未詔免麟游  
岐陽今歲課役岐州及供頓縣半歲九月丁酉至自萬  
年宮

顯慶二年閏正月壬寅如洛陽宮二月癸亥降洛州囚  
罪徒以下原之免民一歲租調賜百歲以上蠶桑粟帛

十一月戊戌如許州甲辰遣使慮所過州縣囚乙巳赦  
鄭州免一歲租賦賜八十以上粟帛其當事高祖任佐  
史者以名聞十二月乙卯如洛陽宮丁卯以洛陽宮為  
東都 四年閏十月戊寅如東都辛巳詔所過供頓免  
今歲租賦之半賜民八十以上氈衾粟帛 五年正月  
甲子如并州己巳次長平賜父老布帛二月丙戌赦并  
州及所過州縣義旗初嘗任五品以上葬并者祭之加  
佐命功臣食別封者子孫二階大將軍府僚佐存者一



隋民年八十以上版授刺史縣令賜酺三日三月丙午  
皇后宴親族于朝堂會命婦于內殿賜從官五品以上  
并州長史司馬勲一轉婦人八十以上版授郡君賜氍  
毹布粟四月癸巳如東都

舊唐書高宗本紀龍朔元年三月壬戌幸合璧宮七月  
癸卯車駕還東都八月丙戌令諸州舉孝行尤著及累  
葉義居可以勵風俗者九月甲辰以河南縣大女張年  
百三歲親幸其第天宮寺是高祖潛龍時舊宅上周歷

殿宇感愴久之度僧二十人壬子勅中書門下五品已上諸司長官尚書省侍郎并親王三等以上並詣沛王宅設宴禮奏九部樂禮畢賜帛雜綵等各有差十月丁卯狩于陸渾癸酉還宮

冊府元龜咸亨元年九月丁丑京師久旱詔來年正月幸東都在路供頓所須並令司稼自供不得令州縣差科所經道路修理開拓水可涉渡不煩造橋築宮又擬置御營之驛並不敢擅加修補在路不得妄有進獻

唐書高宗本紀咸亨二年正月乙巳如東都二月辛未遣使存問諸州十一月庚戌如許州遣使存問所過老疾鰥寡慮囚十二月癸酉獵于昆陽丙戌如東都

儀鳳元年二月丁亥如汝州溫湯遣使慮免汝州輕繫三月甲辰如東都免汝州今歲半租賜民八十以上帛四月戊申至自東都

冊府元龜儀鳳三年五月壬戌發京師幸九成宮丙戌至九成宮是日山中霖雨大寒從行兵士有凍死者各

賜絹三匹給棺槨官為埋殯又九月丁巳車駕發九成宮辛酉至京師十月詔曰咸京天府地隘人繁百役所歸五方胥萃雖獲登秋之積猶虧浹歲之資眷言于此思蠲徭賦夫以交風輿壤測景神州職貢所均水陸輻輳今茲豐熟特倍常時事貴從宜實惟權道即以來年正月幸東都關內百姓宜免一年庸調及租并地于稅草其當道諸縣特免二年劍南隴右諸軍每供進物一二年且停

永淳元年四月丙寅如東都

舊唐書高宗本紀永淳元年四月丙寅幸東都上以穀  
貴減扈從兵士庶從者多浮跽于路戊寅次澠池之紫  
宮乙酉至東都

唐書高宗本紀弘道元年正月甲午幸奉天宮四月己  
未如東都

冊府元龜先天元年十一月睿宗命帝巡邊詔曰先王  
省方所以觀風設教聖人順動所以刑清眚服故協時

同律虞典之常道喬嶽翕河周詩之盛德自王風不競  
茲禮遂亡兩漢本朝有時于邁三國以降日不暇給我  
皇家開元首出十代重光寰宇大寧車書無外文祖神  
宗之德洽于人心考祥展義之規昭于國典皇帝天錫  
英武神與聰明自陟元后實總朕師時政益明彝倫攸  
敘而邊氓遐阻藩服悠曠式慰來蘇之懷實允卜征之  
意加以頃年邊將授任或乖師旅以虧軍威不振今盛  
德在水玄冥御辰天道成于積陰王制崇于大闕皇帝

宜順時巡狩親幸邊陲掌圖修考事之儀典樂具陳詩  
之禮西泊河塞東踰燕朔望秩名山肆覲羣后休農問  
老誓師訓率其有牧州典郡功施于人杖節擁旄隱若  
敵國者當崇進律之賞加以分麾之命若郡政不舉軍  
令莫修聚斂苛細侵削戰士者宜明茲憲典肅以天誅  
然後七萃騰裝三軍按節合符釜山之典覽軒帝之餘  
風勒騎單于之臺踐漢王之故事使陰山罷祲大漠無  
塵其供帳所資儲擬之費皆令有司支備不得煩人甲

午帝以北巡之故慎選良將乃以幽州防禦使幽州都督宋璟為左軍大總管和戎等軍大使并州長史薛訥為中軍大總管兵部尚書郭元振為右軍大總管既而竟不行二年八月癸卯制曰咸維京師建都惟舊乃眷時邁卜御斯在自中宗入關于今八載省方之典久而莫修遂使水漕陸輓方春不息勞人奪農卒歲何望關東嗟怨朕實閔焉思欲寧人而休轉運館穀而就教庾加以暑雨作害災拂秦川歲星有福祥歸豫野朕情



深救弊身豈懷安博考靈心審聽輿語上奉天以為孝  
下利人以為忠順時而動從衆之願宜以今年十一月  
行幸東都凡厥有司各恭乃事至于從行兵馬供頓貯  
積務在撙節勿使煩勞考使選人咸令都集東都宮殿  
須理量加補葺不得煩人朕本為人而行非擬勞人自  
奉所過州縣無費黎元亦不得輒有差科旁求進獻宣  
布遐邇知朕意焉十月己亥幸新豐之溫湯乙巳至自  
溫湯

開元二年九月戊申幸新豐之溫湯十一月甲申勅曰  
惟此新豐是出古之順豫義兼巡省頃者觀風數臨茲  
地以寬滯詢于故老閭里歡康田疇墾闢況冬降積雪  
春期有年且諺王遊果符時邁千乘萬騎咸給于主司  
而累月再來頗勤于除掃且下復蠲之令慰其望幸之  
心新豐縣百姓免一年雜差科縣官及溫泉監官經兩  
度祇承者與一中上考三年十月癸亥幸郿縣之鳳  
泉湯甲戌制曰詩人賦田以備蒐狩之義王者順時式

展畋遊之禮頃者築塲神甸清道子來經上林之苑園  
指扶風之藪澤雖獵將提鼓虞人植旗仍憫沍寒之節  
不行肅殺之命豈惟虞舜之典咸秩山川所冀周文之  
風及于鳥獸繇是罷還士卒非重盤遊養彼吏人致有  
煩擾所謂行者幸也後來其蘇宜申恩惠用符古昔所  
經州縣供承頓官百姓并告營幕橋道等事宜令所司  
勘會奏聞其緣御路及頓塲麥苗有損者亦令具實奏  
聞十一月己卯至鳳泉湯是月詔曰陳詩展義問俗觀

風乃王者之所務也頃屬農事皆隙歲功有成近歷鄆  
鎬左連岐雍見江山秀麗溝塍綺錯長楊鄠杜之間竹  
林園果之富相望于道家給人足謂之時邁頗慰予懷  
思所以問耆老恤淹滯舉逸人旌賢士庶協巡遊之典  
以符行在之恩駕所過之縣見禁囚徒以下咸宜放免  
流以上罪犯具狀奏聽進止古者親問高年養存孤老  
年九十以上并篤各賜物四段錦布各一匹 五年正  
月辛亥幸東都庚申勅曰行幸所經州宜令紫微令黃

門平章事蘇頌訪察刺史上佐政術定作三等奏聞二月甲戌至東都六年七月辛酉詔曰觀俗省方所以愛人治國崇尊廟貌所以事神享親欽若昔典此惟大義朕祇膺鴻業積稔咸泰去歲欲幸洛京已發成命旋屬重營太廟因將中止未即展軫効駕信弗可違終肆覲于東方當載馳于西土流晷不駐通喪永畢象居始成如在增慕朕之前志日夜匪遑故可以詩陳肅雍禮極禋祀况神明之隲時惟雍州稼穡有年莫若闕輔王

假用吉后來其蘇實獲我心俾從人欲可以今年十月  
取北路幸長安所司準式務在節省無得勞費甲寅復  
詔曰兩京來去乃是尋常緣頻所須皆用官物至于百  
姓縱暫祇承處置有條不合辛苦其中侵擾莫非橫干  
或漁獵畜養以將進獻徒使役以徇聲名實由綱紀未  
樹教令不行去年從京向都嘗亦處分蒲州刺史程行  
謏同州刺史李朝隱陝州姜師度至其州界咸有進奉  
惜其能善政故乃屈法收情憶至于今豈能無怪冬中

西幸不可踵前其有輒進送及餉遺從官并別有煩擾者必科以法御史明加糾察隨時奏聞九月辛卯以將作大匠韋漆為東都留守十月甲寅還京十一月辛未至自東都 九年九月甲戌詔曰王者觀俗以賦政考祥以省方必將協于人和而奉若天命朕祇承鴻業用康黎庶思振德以惠物豈勞人以尊已頃年關輔之地轉輸實煩重以河塞之役兵戎屢動千金有費九載未儲懷此勞軫以增旰昃且夫苟利于物可隨方而變通

將適于人故因時以巡幸卜洛萬方之輿維嵩五岳之  
中風雨之所交舟車之所會流通江汴之漕控引河淇  
之運利俗阜財於是乎在今欲省其費務以實關中即彼  
教庾少留河邑乘歲陽之吉展遊順之儀豈惟龜筮不  
違故亦詢謀是協脩五禮問百年車輿動而不勞玉帛  
會而胥悅所謂先天以宏道因人以為利也宜以明年  
正月十五日幸東都

唐書玄宗本紀開元十年正月丁巳如東都二月丁丑



次望春頓賜從官帛

冊府元龜開元十年正月丁巳幸東都二月戊寅至東都八月壬子制曰朕頃自鎬京省方于雒本以息轉輸之費即河漕之殷今屬宗廟改修禮崇昭事永言配享必在躬親又眷彼晉陽是稱重鎮將陳詩以問俗式安邊而訓武雖來往祇供頗有煩役而國之大事不可云勞宜以明年正月三日發雒幸并州取便路還京應須支計所留準式緣頓祇承一事以上並用當處官物不

許科斂百姓其遞運及從兵馬官寮等務從減省所在公私並不得輒有進獻違者所由州縣官及進獻人各量事貶罰布告遐邇咸使聞知

唐書玄宗本紀開元十一年正月丁卯降東都囚罪杖以下原之已巳如并州降囚罪徒以下原之賜侍老物庚辰次潞州赦囚給復五年以故第為飛龍宮辛卯次并州改并州為北都癸巳赦太原府給復一年下戶三年元從家五年版授侍老八十以上上縣令婦人縣君

九十以上上州長史婦人郡君百歲以上上州刺史婦人郡夫人二月壬子如汾陰賜文武官階勲爵帛三月辛未至自汾陰免所過今歲稅赦京城

舊唐書玄宗本紀開元十二年十一月庚午幸東都至華陰上製嶽廟文勒之于石立于祠南之道戊寅至自東都

唐書玄宗本紀開元十三年十月辛酉如兗州庚午次濮州賜河南北五百里內父老帛十一月庚寅封于泰

山辛丑禪于社首壬辰大赦賜文武官階勲爵致仕官  
一季祿公主嗣王郡縣一子官諸蕃酋長來會者一官  
免所過一歲兖州二歲租賜天下酺七日丁酉賜徐曹  
亳許仙豫六州父老帛十二月己巳如東都

冊府元龜開元十五年六月己巳西京父老詣闕上表  
請幸帝手詔許之甲寅制曰朕粵自鎬豐省方漙維屬  
九服寧宴四時順成殊徵龐殷景福紛委遂荷靈睭登  
于介丘先天成功允答休祐蓋敬天知命不敢以寧也

我來于東歲亦數稔而西土耆老篋予多怨况闕輔之地頃則有年宜叶卜征之祥式展時巡之義可以今年閏九月十日取北路幸長安所司准式緣頓支供一事以上並用當處官物不須科斂百姓其遞運及行從官寮等務從減省所在公私不得輒有進獻宣布遐邇知朕意焉八月己巳制曰朕君臨區宇子育黎元每懷勤恤不欲勞煩而鎬京之地陵寢所在自展義河雒已歷歲年所以式尊卜征有事時邁抑惟嘗典寧敢憚勞將

欲西巡元取北路今同州有暴水浸于邑居載懷憂惕  
無忘鑒寐且從南路幸長安所司准式閏九月庚申發  
東都幸京師十月己卯至京師 十九年六月丁卯制  
曰三秦九維咸曰帝京五載一巡時維邦典上庠多饒  
衍之美仍勞于轉輸中壤均舟車之湊頗聞于殷積朕  
所以相時度宜期于利物者也况河汴頻稔江淮屢登  
二周馳望幸之誠三川勤篚予之請然猶未便順動且  
念人勞期以來年方議時邁而頃京輔近甸膏澤未均

陝雒之交稼穡亦盛固不可俟于今日庶用協乎光天  
豈肆心于宴安期順人而從幸兩京供帳宿有儲擬十  
月滌塲是因暇隙信可備法駕整勾陳清蹕峭潼觀風  
河雒宜以今年十月四日幸東都所司准式十月丙申  
幸東都勅供頓州縣百姓所緣料及充木匠雜祇供人  
等宜放今年地租自餘戶等免今年地稅半應定供頓  
縣官各與一中上考庚辰至東都

唐開元禮皇帝巡狩告園丘

告社廟及歸  
格禮並附

# 齋戒

將告前一日皇帝齋於太極殿如郊祀之儀凡應告之

官清齋于告所

告社齋于太社  
告廟齋于廟所

近侍之官應從升者及

羣官客使等各於本司及公館各清齋一宿諸衛令其

屬晡後一刻各以其方器服守衛壝門

社則社門  
廟則廟門

與太

樂工人俱清齋一宿

## 陳設

前告三日尚舍直長施大次于外壝東門之內道北南



向

社則宮西門  
廟則廟東門

尚舍奉御鋪御座衛尉

社則守官  
廟同社設文

武侍次於大次之後文官在左武官在右俱南向設告

官從駕羣官次各於常所設陳饌幔於內墻東門之外

道南北向

社無饌幔  
廟同社

前二日太樂令設宮懸之樂於壇

南

社則于壇  
北廟于庭

設登歌及舉麾位於壇上

廟于  
殿上

並如常儀

社自此則右校清掃內外  
為瘞瘍二于樂懸北如常

前一日右校掃除壇之内外

郊社令積柴於燎壇方一丈二尺開上南出戶高四尺

社無燎壇  
廟同社

奉禮設御位於壇之東南南向

將告奉禮郎  
一人守之在

位板西南五步所西向社設御位於北門之內當社壇南向廟於東階東南西向設望燎位當

柴壇之北南向設告官及從駕羣官板位於內外如常

儀郊社令

廟太廟令

帥府史一人

社二

及齋郎以樽坵壘洗

篚羃及玉幣之篚入設於位並如常儀

廟酒樽位於堂上前楹間各於

室外之左北向每室春夏雞彝一鳥彝一犧樽二秋冬  
犛彝一黃彝一著樽二皆如勺羃俱西上各有坵以置  
瓚執樽壘篚羃者各位於樽壘篚羃之後告日未明十

五刻太史令郊社令設昊天上帝神座於壇上北方南

向席以藁秸設神座於座首

廟太廟令整拂神幄又帥  
府史齋郎以樽坵壘洗篚

纂入設  
於位

告日未明十刻太官令帥宰人以鑾刀烹牲於

厨

社告日未明十五刻太官令帥人烹牲於厨牲用黑

牛二齋郎以豆取牲血如常未明四刻太史命郊社  
令各服其服升設神座席  
位如常廟每室各一犢

鑾駕出宮

社廟  
同

皇帝服袞冕之服乘玉輅備大駕及嚴鼓時奏請發內  
外器服皆如常儀

親告

告社則薦玉帛及進熟  
告廟則晨裸及饋食

其日未明三刻諸告官各服其服郊社令良醢令各帥

其屬入實樽壘玉幣

太廟實以汎齊凡樽皆二其元酒各實于上樽禮神之玉以蒼璧其

幣以蒼社太壘實以醴齊配座以象樽實亦如之明水實于上樽玉兩珪有邸太祝各以幣置于籩幣隨牲色各長大八尺晨裸雞彝尊彝犧樽著樽之上實以明水鳥彝黃彝實以鬱鬯犧樽著樽實以醴齊

太官

令帥進饌者實簋豆簋簠入設于內壝東門外饌幔內

社於未明二刻奉禮帥贊者先入就位贊引引御史太

祝以下入行掃除如常儀訖各引就位

廟又未明一刻贊引引太廟令

太祝宮闈令入當階間北面西上立定奉禮曰再拜贊者承傳太廟令以下皆再拜升東階入開瑤室奉出獻祖以下九室神主各置於座訖各就位駕將至謁者贊引各引告官以下

及從告羣官客使先置者俱就門外位駕至大次門外  
迴輅南向領千牛將軍降立於輅右侍中進當轡駕  
前跪奏稱侍中臣某言請降輅俛伏興還侍位皇帝

降輅之大次協律太樂令帥工人各入就位

凡升壇坐者皆

脫履于下降納如常儀降輅之大次郊社以祝版進署如常儀謁者贊引各引從駕羣官俱就門外位奉禮帥贊者先入就位贊引引御史及諸太祝與執樽壘篚罍者入就位大樂令帥工人次入就位通事舍人各引告官及從告羣官客使次入就位升壇者脫履如常儀太廟令以祝版進置通事舍人引從駕羣官就入  
皇帝停大次半刻頃謁者贊引引從駕羣官入

外位

就位太常博士引太常卿立於大次門外當門北向侍

中板奏外辨皇帝服大裘而冕出次華蓋侍衛如常儀

侍中負寶陪從如常社停大次太常博士引太常卿立於大次門外當門北向侍中板奏外辨皇帝出次華蓋

侍衛如常博士引太常卿太常卿引皇帝凡太常卿前導皆博士先

引至內壝門外社社宮北門外廟廟門外殿中監進鎮圭華蓋仗衛

停於門外近侍者從入如常謁者引禮部尚書太常少

卿陪從如常社無謁者引下皇帝至板位西向立每立定太

常卿博士退立於左告通事舍人各引從告官及諸王南北儀皇帝北面立

介公鄴公諸方客使以次入就位立定

社無通事舍人各引下至此廟

同太常卿前奏稱請再拜退復位皇帝再拜奉禮曰衆

官再拜贊者承傳

凡奉禮下辭贊者皆承傳

衆官在位者皆再拜

其先

拜者不拜

太常卿前奏有司謹具請行事退復位協律郎跪

俛伏興舉麾

凡取物者皆跪伏而取以興奠物則奠訖俛伏後興

鼓祝奏元和之

樂乃以圜鍾之均作文舞之舞六成偃麾戛敔樂止

凡樂

皆協律郎舉麾工鼓祝而後作偃麾戛敔而後止社奏順和之樂以函鍾之均樂八成廟奏永和之樂以黃鍾

之均樂九成黃鍾三奏大呂太簇應鍾各再奏

太常卿前奏稱請再拜退復位

皇帝再拜奉禮曰衆官再拜衆官皆再拜

廟則晨裸太常卿引皇帝

詣壘洗太和之樂作樂止侍中跪取匱興沃水侍中跪  
取盤興承水皇帝搢鎮圭盥手黃門侍郎跪取巾於匱  
興進皇帝悅手訖黃門侍郎受巾跪奠於匱黃門侍郎  
又取瓚於匱興進皇帝受瓚侍中酌壘水又侍中奉盤  
皇帝洗瓚黃門侍郎受中奠於匱皆如初皇帝拭瓚訖侍中奠  
盤匱黃門侍郎受中奠於匱皆如初皇帝拭瓚訖侍中樂  
作升階樂止侍中以下量人從升太常卿引皇帝詣獻  
祖樽壘所執樽者舉罍侍中贊酌鬱酒訖登歌作肅和  
之樂以圜鍾之均自後登歌皆歌圜鍾太常卿引皇  
帝入詣獻祖神座前北向跪以鬯裸地奠之俛伏興太  
常卿引皇帝出戶北向再拜訖太常卿引皇帝詣懿祖  
樽彝所執樽者舉罍侍中取瓚于坫進皇帝受瓚侍中  
贊酌鬱酒訖太常卿引皇帝入詣懿祖神座前北向跪  
以鬯裸地奠之俛伏興太常卿引皇帝出戶北向再拜



訖太常卿引皇帝次裸太祖次裸世祖高祖太宗高宗中宗睿宗並如上儀訖登歌止太常卿引皇帝樂作皇

帝降自阼階至版位西向立樂止諸太祝俱取玉幣於篚各立於樽所

廟無太祝取玉帛至樽所太常卿引皇帝太和之樂作皇帝每行皆作太和之樂

皇帝詣壇升自南陛社升北陛以下近侍者從升如常

儀皇帝升壇北向立社南樂止太祝加玉於幣以授侍

中侍中奉玉幣東向進社西皇帝受玉帛登歌作肅和

之樂太常卿引皇帝進北向社南跪奠於天帝神座社太

座社俛伏興太常卿引皇帝少退北向社南再拜訖登歌

止樂作

社又太常卿引皇帝立於東方西向太祝以幣授侍中侍中奉幣南面進皇帝進西向跪奠于

后土氏座興太常卿引少退再拜訖登歌止皇帝降自北陛樂作太常卿引皇帝詣太稷壇升奠玉幣于太稷

氏升降如太社壇

皇帝降自南陛還版位西向立樂作初羣官

拜訖謁者引司徒太官令出帥進饌者奉饌陳於內壝

東門之外司徒奉天帝之俎皇帝既至位樂止太官令

引饌入俎入門雍和之樂作饌至階樂止饌升於南陛

太祝迎引於壇上各設於神座前

籩豆盞罍徹之如式

設訖謁者

引司徒以下降自東陛復位諸太祝各還罇所

社儀皇帝奠玉

帛訖降還板位下有進熟篇皇帝既升奠玉幣太官令  
出帥進饌者奉饌陳于西門外司徒奉太社之俎初皇  
帝既至位樂止太官令引太社太稷之饌入自正門后  
土后稷之饌入自左門俎初入門雍和之樂作饌至陞  
樂止太社太稷之饌升自北陞后土后稷之饌升自西  
陞諸祝迎引於壇上各設於神座前廟儀於此有饋食  
篇皇帝既升裸太官令出帥進饌者奉饌陳于東門外  
謁者引司徒出詣饌所司徒奉獻祖之俎初皇帝既至  
位樂止太官令引饌入自正門俎初入門雍和之樂作  
以無射之均自後接神皆奏無射饌至太陞諸太祝迎  
引於陞上樂止各設于神座前設訖謁者引司徒以下  
降復位諸祝各還尊所太常卿引皇帝詣壘洗樂作皇  
帝至壘洗樂止盥手洗爵侍中黃門侍郎贊洗如晨裸  
之儀太常卿引皇帝樂作升阼階樂止詣獻祖罇彝所  
侍中贊酌醴齊壽和之樂作每酌獻皆作壽和之樂太  
常卿引皇帝入詣獻祖神座前北面跪奠爵俛伏興出

戶北向立樂止太祝持板進於室戶外之右東面跪讀祝文祝文臨時制讀訖興皇帝再拜初讀祝文訖樂作太祝入奠祝板於神座興出還罇所太常卿引皇帝詣懿祖罇彝所酌獻如初儀唯不盥洗訖太常卿引皇帝詣東序西向立樂止太常卿引皇帝詣壘洗樂作皇帝至壘洗樂止

侍中跪取匱興沃水又侍中跪取盤興承水皇帝盥手黃門侍郎跪取巾於篚興進皇帝悅手訖受巾跪奠於篚遂取匏爵於篚興進皇帝受爵侍中酌壘又侍中奉盤皇帝洗爵黃門侍郎又受巾皆如初皇帝拭爵訖侍中奠盤匱黃門侍郎受巾奠於篚皆如常太常卿引皇

帝樂作皇帝詣壇升自南陛

社則升太社北陛

樂止近侍者從

升如常謁者引司徒升自東陛

社則西陛

立於罇所齋郎奉

俎從升立於司徒之後太常卿引皇帝詣天帝

社云太社下微

此酒罇所執罇者舉翬侍中贊酌汎齊

社醴齊

訖壽和之

樂作

皇帝每酌獻及飲福酒皆作壽和之樂

太常卿引皇帝進天帝神座

前北向跪

社南面

奠爵俛伏興太常卿引皇帝少退北面

立樂止太祝持版進於神座之右東面

社西面

跪讀祝文

祝文臨時撰社廟同

訖興皇帝再拜初讀文訖樂作太祝進奠版

於神座還罇所

社皇帝拜訖樂止太常卿引皇帝詣后土氏酒尊所酌獻西向奠爵讀祝文如

上儀訖太常卿引皇帝詣太稷壇升降酌獻如太社儀

太常卿引皇帝進天帝神

座前北面立樂作太祝以爵酌福酒合置一爵一太祝

持爵以授侍中侍中受爵西向進皇帝再拜受爵跪祭

酒啐酒奠爵俛伏興

廟皇帝獻將畢謁者引司徒自升東階立於前楹間北面諸祝各酌

福酒合置一爵侍中贊祭啐如常儀

諸太祝各帥齋郎進俎太祝減神前

胙肉加於俎興以胙肉共置一俎上授司徒司徒奉俎

西向進皇帝受以授左右

廟祝帥齋郎減胙肉又以籩取黍稷飯肉共一籩先以飯

授司徒司徒奉進授皇帝以授左右次受胙

皇帝再拜跪取爵遂飲卒爵侍

中進受爵以授太祝太祝受爵復於坵皇帝俛伏興再

拜樂止太常卿引皇帝樂作皇帝降自南陛

社降北陛太常卿引

詣太稷行事如太社訖降陛廟降阼階

還版位西向立樂止謁者引司徒

降復位太祝各進徹豆還罇

徹者籩豆各一少移於故處廟司徒復位登歌作諸

祝入室徹豆登歌止

奉禮曰賜胙贊者唱衆官再拜在位者皆再

拜樂作太常卿前奏稱再拜退復位皇帝再拜衆官皆

再拜樂一成止太常卿前奏請就望燎位

社則望瘞太下倣此

常卿引皇帝樂作皇帝至望燎位

社則就望瘞位

南向立樂止

於羣官將拜諸太祝各以篚進神座前取玉帛祝版齋

郎以俎載牲醴黍稷飯爵酒興各自其陛降壇南行當

柴壇南東行自南陛登柴壇以玉帛饌物置於柴上訖

奉禮曰可燎東西面各四人炬燎火半柴

社則降壇南當瘞塢西行

諸祝以玉帛饌物置于塢奉禮曰可瘞塢東西面各四人實土

太常卿前奏禮畢

廟無望燎

儀太常卿引皇帝出內壝門

社出宮門廟出廟門

殿中監前受鎮

珪華蓋侍衛如常儀皇帝入次樂止謁者贊引各從告



官及從駕羣臣諸方客使以次出贊引引御史以下俱復執事位立定奉禮曰再拜御史以下皆再拜贊引引出工人以下以次出

社廟祝版燎於齋所

鑾駕還宮

皇帝既還大次侍中版奏請解嚴

將士不得輒離部伍

皇帝改服

通天冠絳紗袍乘金輅鼓吹振作奏請還宮如常儀

皇帝巡狩

鑾駕出宮

將巡狩所司承制先頒告於東方諸州曰皇帝二月東  
巡狩各修平乃守考乃職事無敢不敬戒國有大刑駕  
將發告園丘宗廟社稷皆如別儀皇帝出宮大備鹵簿  
皆如常儀輶於國門祭所過山川如親征之禮所經州  
縣刺史縣令先待於境通事舍人承制問百年古先帝  
王名臣烈士皆州縣致祭

燔柴告至

將告將作先於太山下修圓壇四出陛

若先有封禪祀  
天壇即不須別

築前告三日尚舍直長施大次於外壝東門之內

其設文武

侍臣次陳饌位

設宮懸樂燎壇之制

一如園丘之儀

前一日皇帝清齋

於行宮應告之官皆於告所清齋一日近侍之官應從升者及從告羣官諸方便客皆於其所俱清齋一宿諸衛令其屬晡後一刻各以其方器服守衛壝門與大樂工人俱清齋一宿奉禮設御位於壇之東南西向設告官司徒執事者御史奉禮贊者協律郎太樂令望燎位東方諸州刺史縣令介公鄒公文武九品以上者西方

北方蕃客等位並如上辛園丘儀

其褒聖侯等亦如之

設告官以

下門外位於東西壝門之外道南皆如設次之式郊社

令帥府史一人及齋郎以罇坫罍洗篚簋入設於位並

如常儀執罇罍篚簋者各位於罇罍篚簋之後告日未

明十五刻太官令帥宰人烹牲於厨

蒼牲一  
騂牲一

未明四刻

太史令郊社令各服其服設昊天上帝神座於壇上北

方南向席以藁秸設高祖神堯皇帝神座於東方西向

席以莞設神位各於座首未明三刻諸告官以下各服

其服郊社令良醞令各帥其屬入實罇壘及玉

天帝太罇二配

帝著罇二俱實以汎齊其明水各實于上罇玉以蒼璧幣一丈八尺

太祝以玉帛置於籩

太官令帥進饌者實諸籩豆簠簋等皆設於饌幔內未

明二刻奉禮帥贊者先入就位贊引引御史太祝以下

入行掃除如常儀訖各就位皇帝服袞冕乘輅發行宮

奏請進發內外器服如常儀駕將至謁者贊引各引告

官通事舍人引從告羣官東方刺史縣令諸方客使俱

就門外位駕至大門外次迴輅南向

其降輅之大次謁者引告官及從告

羣官入就位皇帝奠玉帛等儀並如圜丘初皇帝既升奠玉帛太官令帥進

饌者

其奉饌奏樂之儀並如圜丘天帝之饌升自南陛配帝之饌升自東陛

諸太祝迎引

於壇上各設於神座前設訖謁者引司徒以下降自東

陛復位諸太祝各還罇所太常卿引皇帝詣壘洗樂作

其盥洗酌獻奏樂讀祝之儀並如圜丘其祝文臨時撰

訖興皇帝再拜初讀祝文

訖樂作太祝進奠版於神座還罇所

其酌獻配帝奏樂讀祝之儀並如圜

丘皇帝拜訖樂止太常卿引皇帝進天帝神座前北向

立樂作太祝各以爵酌福酒

其飲福受胙奏樂皇帝還版位之儀並如圜丘謁

者引司徒降復位太祝各進徹豆還罇所奉禮曰賜胙  
其衆官受胙皇帝望燎及太祝燎牲體玉幣  
皇帝還大次禮官二人次出等儀並如園丘

鑾駕還行宮

皇帝既還大次侍中版奏請解嚴

將士不得  
輒離部伍

皇帝改服

通天冠絳紗袍乘輅奏請還宮如常儀

望秩于山川

柴之明日望秩祀于岳鎮海瀆山林川澤丘陵墳衍原  
隰將祭所司先為壇於祭所其神皆以尊卑為敘重行

南向前三日守宮設祭官以下次於東壝之外道南北  
向以西為上設陳饌幔於內壝東門之外道北南向前  
二日太樂令設宮縣之樂於壇南設登歌於壇上皆如  
常儀右校掃除壇內外又為瘞埽於壇北之壬地外壝  
之內方深取足容物前一日諸祭官各清齋於祭所諸  
衛令其屬晡後一刻各以其方器服守衛壝門與太樂  
工人俱清齋一宿奉禮設祭官位於內壝東門之內道  
北執事位於道南俱西向北上設御史位於壇下一位



於東南南向一位於西南東向令史各陪其後設奉禮  
位於樂懸東北贊者二人在南差退俱西向協律郎位  
於壇上在西陛之西東向設太樂令位於北懸之間設  
望瘞位於瘞塹之東西向設祭官以下門外位於外壝  
東門之外道南每等異位北向西上設酒罇之位岳鎮  
海瀆各山壘二山川林澤俱蜃罇二丘陵墳衍原隰俱  
散罇二各於壇上南陛之東北向西上

其岳壇上加山  
壘二壘置于山

罇東北向  
皆加勺罍

設玉篚於罇站之所設洗於壇南陛東南如

常執罇罍篚冪者各位於罇罍篚冪之後郊社令帥齋  
郎以罇坩罍洗篚冪入設於位祭日未明十五刻太官  
令帥宰人以鑾刀割牲齋郎以豆取牲血置於饌所遂  
烹牲未明二刻太史令郊社令各服其服入設神位各  
於壇上北方南向席皆以莞設神位各於座首未明一  
刻祭官以下各服其服郊社令良醢令入實罇罍及玉  
山罍實以醢齊蜃罇實以沈齊散罇及山罍皆實以清  
酒齊加明水酒加元酒各實于上罇祭神之玉以兩珪  
有太祝以幣置於篚太官令帥進饌者實諸籩豆簠簋  
郊

等奉禮帥贊者先入就位贊引引御史太史執罇罍籠  
罍者入自東門當壇南重行北向西上立定奉禮曰再  
拜贊者承傳御史以下皆再拜訖執罇罍籠罍者各就  
位贊引引御史詣壇東陞升行掃除於上令史祝史行  
掃除於下訖引就位贊明謁者引獻官贊引引執事者  
俱就東門外位太樂令帥工人次入就位謁者贊引各  
引獻官以下入就位立定奉禮曰再拜在位者皆再拜  
謁者進獻官之左白有司謹具請行事退復位協律郎

跪俛伏興舉麾鼓祝奏順和之樂蕤賓之均

自後壇下之樂皆奏

姑洗樂三成偃麾戛敔樂止奉禮曰再拜獻官以下皆再

拜太祝取玉於篚立於罇所謁者引獻官詣岳壇升自南陛北向太祝以玉幣東向授獻官受登歌作肅和之樂以函鍾之均謁者引獻官進北面跪奠於岳神之座俛伏興謁者引退北面再拜訖登歌止謁者引獻官降自南陛還本位初獻官升奠玉幣太官令帥進饌者奉饌陳於東門外登歌止太官令引饌入俎初入門雍和

之樂作饌至陞樂止饌升南陞太祝迎引於壇上設於

岳神座前

籩豆蓋罍徹之如式

設訖太官令以下降自東陞以出

太祝還罇所其鎮海以下之饌皆祝史迎於壇上設於

神座前相次而畢訖謁者引獻官詣壘洗盥手訖洗爵

謁者引升自南陞詣酒罇所執罇者舉罍獻官酌醑齊

訖樂作謁者引詣岳神座北向跪奠爵興謁者引獻官

少退北向立樂止初獻官進奠爵祝史各以爵酌奠鎮

海以下還罇所太祝持版於神座之右東面跪讀祝文

祝文臨  
時撰

訖興獻官再拜初讀祝文訖樂作太祝進奠版

於神座還罇所獻官拜訖樂止太祝酌壘福酒進獻官

之右西向立獻官再拜受爵跪祭酒啐酒奠爵興太祝

帥齋郎進俎太祝減神前二牲胙肉

皆取前脚  
第二骨

加於俎

西向授獻官受以授齋郎獻官跪取爵遂飲卒爵太祝

受爵復於坵獻官興再拜謁者引獻官降復位諸祝各

徹豆如常訖還罇所奉禮曰賜胙贊者唱再拜在位者

皆再拜

獻官  
不拜

順和之樂作奉禮又曰再拜獻官以下皆

再拜樂一成止謁者進獻官之左白請就望瘞位西向  
立於衆官將拜諸太祝各執篚進神座前跪取玉幣齋  
郎以俎載毛血等各由其陞降壇詣瘞塹以物置於塹  
訖奉禮曰可瘞塹東西各四人寘土半塹謁者進獻官  
之左白禮畢遂引出贊引引執事以次出又贊引引御  
史太祝以下俱復執事位奉禮曰再拜御史以下皆再  
拜訖出贊引引工人以次出其祝板燔於齋所

肆觀東后

望秩之明日肆覲東后於告至之前刺史縣令皆先奉  
見如常將作先於行宮之南為宮壝方三百步面一門  
為壇於壝內三分壝二在南壇方九丈六尺高四尺四

出陛

南面兩陛餘三面各一陛

前二日太樂令設宮懸之樂於壇南

如殿庭之儀前一日尚舍鋪御座於上近北南向又設  
解劍席於南陛之西南守宮於門外量設百官次文東  
武西以北為上東方刺史縣令次於文官之南蕃客次  
於武官之南所司陳輦輅於壇南如常典儀設羣官板



位文官一品以下九品以上位於壇東南每等異位重行西面以北為上武官一品以下九品以上位於壇西南當文官每等異位重行東面以北為上東方刺史縣令於壇南三分庭一在南每等異位重行北面以西為上若有蕃客則位於刺史之西每國異位重行北面以東為上設典儀位於南陛之東贊者二人在南差退俱西向北上奉禮設門外位文官一品以下九品以上位於門東每等異位重行西面武官一品以下九品以上

位於門西每等異位重行東面俱以北為上設東方刺史縣令位於文官之南每等異位重行西面以北為上蕃客位於武官之南每國異位重行東面以北為上其日未明三刻諸衛各以其方器服量設牙旗於壝外面未明一刻諸衛各勒所部列黃麾大仗屯門及鉞戟陳於壝內如殿庭之儀羣官及刺史以下集各就次服其朝服蕃客集次各服其服侍中板奏請中嚴近仗陳於行宮門外諸侍衛之官各服其器服符寶郎奉寶俱

詣行宮門外奉迎典儀帥贊者先入就位吏部兵部主

客戶部贊羣官客使俱出次通事舍人各引就門外位

刺史縣令俱執贊通事舍人引就門外位

贊各以其土所有錦綺繒

布葛越之屬俱五兩為一束而執之仍飾以黃帊

其餘當土常貢之物並盛以

篚其屬執之列於縣令位後通事舍人引文武官一品

以下九品以上先入就位侍中板奏外辦皇帝將出仗

動太樂令令撞黃鍾之鐘右五鐘皆應協律郎舉麾工

鼓祝奏太和之樂皇帝服袞冕乘輿以出曲直華蓋警

蹕侍衛如常儀皇帝入自北壝門由北陛升壇即御座  
樂止腰輿退其羽儀華蓋仍侍於御側通事舍人引東  
方刺史以下入就位鴻臚引蕃客次入就位初刺史入  
壝門懸下舉麾舒和之樂作至位立定樂止典儀曰再  
拜贊者承傳執贊者俱跪奠贊興在位者皆再拜訖跪  
取贊興凡拜奠贊皆如之侍中前承制降詣刺史東北西面立  
稱有制蕃客則舍人承旨宣勅刺史以下皆再拜宣制訖又再拜  
戶部引諸州貢物兩行各入於刺史位前東西陳之龜

為前列金次之丹漆絲纊四海九州美物重行量陳於  
後訖執物者各退立於東西廂文武前側立通事舍人  
引刺史為首者一人執贄詣解劍席跪解劍脫舄執贄  
興舍人接引升壇詣御座前北面跪奏稱具官臣姓名  
等敢獻壤奠遂奠贄俛伏興又舍人跪舉以東授所司  
舍人引刺史降詣解劍席跪佩劍納舄興通事舍人引  
復北面位初為首者奠贄通事舍人引在庭者以次奠  
贄於位前訖各俛伏興引退復位訖刺史以下俱再拜

戶部尚書進詣階間北面跪奏稱戶部尚書臣某言諸州貢物請付所司俛伏興侍中前承詔退稱制曰可尚書退復位所司受贄其執貢物各進執物所司引退俱出東門初刺史將朝中書侍郎以諸州鎮表方別為一案俟於西門外給事中以祥瑞案俟於東門外俱令史絳公服對舉案侍郎給事中俱就侍臣班初刺史將入門中書侍郎降引表案入詣西階下東面立給事中降引祥瑞案詣東階下西面立刺史將升奠中書令黃門

侍郎俱降立於階下刺史執贄升階中書令黃門侍郎各執所奏之文以次升初戶部尚書奏退復位訖中書令前跪奏諸方表訖黃門侍郎又進跪奏祥瑞各還侍位侍郎與給事中引案退司儀曰再拜贊者承傳文武羣官刺史以下及諸國客俱再拜訖通事舍人以次引北面位者出就門外位侍中前奏稱侍中臣某言禮畢俛伏興還侍位皇帝興太樂令令撞蕤賓之鍾左五鍾皆應太和之樂作皇帝乘輿降自北陛警蹕侍衛如來

儀入行宮樂止通事舍人引東西面位者以次出設會如正會之儀

考制度

朝覲之明日左右丞相以考制度事奏聞命太常卿採詩陳之以觀百姓之風俗命市納賈以觀百姓之所好惡命典禮者考時月定日同律觀禮樂制度衣服正之山川神祇有不舉者為不敬宗廟有不順者為不孝不孝不敬者則長官黜以爵革制度衣服者為叛叛者長



官有討有功德于百姓者加爵賞五月南巡狩至于南  
嶽如東巡狩之禮八月西巡狩至于西嶽如南巡狩之  
禮十有一月北巡狩至于北嶽如西巡狩之禮歸格于  
宗禰用特如別禮若告封禪如別儀

蕙田案開元禮諸儀皆仿虞書舜典禮記王  
制最為雅正


唐書玄宗本紀開元二十一年十月壬午如潞州丙戌  
中書門下憲巡幸所過因辛卯赦潞州給三年賜高年

粟帛十一月辛丑如北都癸丑赦北都給復三年庚申如汾陰大赦免供頓州今歲稅賜文武官階勲爵諸州侍老帛武德以來功臣後及唐隆功臣三品以上一子官民酺三日十二月辛未至自汾陰

冊府元龜開元二十四年正月敕以前議西幸屬歲不登關輔之間且欲無擾今稼漸熟漕運復多而陵寢又違蒸嘗永感農隙順動得非其時前取今年十月幸西京者以其月三日發東都取南路應緣頓所務要崇節

減所司明為條例勿有煩勞十月戊申發東都幸京師  
甲子至陝州丁亥至京師

右唐



五禮通考卷一百七十九